



柳田文庫
文庫11
D 289
18

18



文庫 11
D 289
18

元書卷九十二

忠節列傳第六十七下

邵陽曾廉謨

劉耕孫字存吾茶陵州人也至順元年成進士授臨武縣尹縣近蠻獠耕孫至召父老告之曰吾儒士也今爲汝邑尹爾父老當體吾教訓其子弟孝弟力田暇則事詩書無自棄以干吾政乃爲建學校求民間俊秀教之設俎豆習禮讓三年文化大興邑有茶課歲不過五錠後增至五十錠耕孫言於朝除其額歷建德徽瑞推官所至有聲及斬賊破湖南耕孫傾家貲募義兵以援茶陵賊至輒卻故茶陵久不失守後轉甯國推官歲饑勸富民振粟活者萬計俄長槍軍鎖南班等攻甯國耕孫分守城西南日署府事夜乘墉固守會江浙援兵至城恃之備頗懈賊以四鼓緣堞而上城遂

元書

卷九十二 忠節傳下

三言 卷九十二 一
陷耕孫力戰死弟燾孫與孫燾孫字養吾以國學生下第授常甯州學正湖南陷長吏棄城走民奉州印請燾孫爲主民賴以完者一年外援旣絕死之子碩爲江夏縣魯湖大使起義兵援茶陵亦死之與孫官南豐同知值寇亂仗節死於臺城同時脫脫同知萍鄉州事亦募義兵討賊城陷死之

鄭玉字子美徽州歙人也幼敏悟嗜學長而覃思六經尤邃於春秋絕意仕進門人受業者眾所居至不能容學者相與卽其地構師山書院處焉至正十四年朝廷除玉翰林待制遣使者賜以御酒名幣浮海徵之玉辭疾不起而爲表以進曰名爵者祖宗之所遺使與天下賢者共之待制之職臣非其才不敢受酒與幣天下所以奉陛下陛下得以私與人故臣不敢辭也玉旣不仕則日以著書爲事其目在藝文志十七年明將胡大海入徽州要之使出

玉曰吾知死期至矣二雉入吾室其兆也遂奮身往見大海曰君臣之大義死生之大關天壤閒自有一定吾豈事二姓者哉因被拘久之親朋攜酒具至則從容爲之盡歡且告以必死狀妻程氏聞之使語曰君苟死吾其相從地下矣玉使復之曰若果從吾死復何憾明日具衣冠北面再拜自縊死程亦自盡鄉人卽師山書院改廟祀焉弟璉字希貢元末起義兵以功爲歙縣尹元亡不仕同時安福李廉行簡亦善春秋元季進士爲信豐尹寇至以鄉兵禦之城陷與其子敬同見殺邑人立雙節祠祀之又新城朱倬孟章亦以進士授遂安尹杭寇死又建安雷杭彥舟尹潮陽亦死於賊後贈奉化州知州

林夢正字古泉甯國太平人也以遺逸舉爲溧陽教授蘄黃寇至遇其魁張氏者乃世職千戶也夢正叱之曰爾世受國恩忍爲逆

元書 卷九十二 忠節傳下 二
邪既而寇勢愈盛張令曰有生得林教授者受上賞夢正遂匿搜
得之張曰前日罵我者非子邪曰然曰降則以爾爲元帥夢正曰
爾僞也我何爲降強之再三不應乃縛於樹不解衣冠而殺之
黃翊字孟翔新建人辟掾吉安安城土豪橫殺人有司莫敢逮翊
請行豪樹柵自固翊命拔去惡少年數十輩譁而出翊叱曰汝主
自殺人何與爾事顧甘同滅族耶挺身呼而入豪知勢蹙出求解
且賂之翊諾與俱來寘諸法僞漢陷江西吉安總管以下皆散
走翊獨止孔子廟堂盜知爲府掾強之使行文書翊曰我死卽死
其能官於賊耶盜怒反接於樹意其悔明日抽刀礪其頸翊罵益
厲遂被害時郡人羅明遠獨率敢死士三百餘大呼巷戰寇驚遁
吉安遂復而明遠已負重傷死於陣同邑羅次炳亦倡義被賊禽
備極慘酷死

蕭生字彝翁吉水人初爲建甯學正寇亂家居參政全子仁辟爲
參謀及吉安陷子仁遁去生歎曰有城不守非忠也遇敵不戰非
勇也謀人軍而不死何面目見天下士乎卽投學中井不死眾爭
出之三日不食爲書付家屬竝書之衣帶曰男子之貞猶女之烈
一有玷焉萬善難雪仍自投井中死

彭繼凱分宜人僞漢陷袁州繼凱募義旅迎戰大敗之適安福義
士袁明東引兵來會竝力克復袁城乃下令禁殺掠修城池繕甲
兵弔死恤孤民賴稍安遣人至贛迎舊守寶童歸寶童嫉其功令
刺客殺之城中驚潰義士潰散

伯顏不花的斤字蒼崖左丞相高昌王帖木兒不花子也先世事
具畏吾兒傳伯顏不花的斤倜儻好學曉音律初用父蔭同知信
州路事移建德以平遂安純安功遷本路總管改衢州達魯花赤

行樞密院阿魯灰兵過衢大肆剽掠伯顏不花的斤曰以官軍而爲民患此國賊也帥兵逐之出境郡賴以甯擢浙東都元帥調江東道廉訪副使陳友諒黨王奉國以衆二十萬寇信州明年伯顏不花的斤自衢引兵援焉遇賊城東力戰破走之時鎮南王子大聖奴樞密院判官席順等屯兵城中聞伯顏不花的斤至爭開門出迎羅拜焉伯顏不花的斤登城四顧誓以破賊自許後數日賊復來攻遂大饗士卒而約曰今日破賊不用命者斬乃部分諸將張兩翼出南北門而自與忽都不華爲中軍出西門奮擊入賊營斬首數千級幾禽奉國適賊救至復勒兵力戰始大破之俄而陳友德來營於城東友德友諒弟也乃繞城植木柵攻益急又遣使來說降其將高義潛與賊通因給忽都不華等十人往見奉國奉國囚之不遣明日賊仍令義以計來誘焉伯顏不花的斤坐城上

見義單騎來卽謂曰汝誘十將無一人還今復來誘我耶我頭可斷足不可移乃數其罪斬之由是日夜鏖戰糧竭矢盡而氣不少衰一日有大呼城下者曰有詔參謀海魯丁臨城問之曰何來曰江西來海魯丁曰如此乃賊耳呼者曰我主聞信州久不下知爾忠義故來教爾徒守空城欲何爲耶海魯丁曰汝聞張睢陽事乎僞使者知其不可屈乃去伯顏不花的斤笑曰賊欲我降耶吾誓與城存亡計之熟矣是時軍民惟食草苗茶紙旣盡又括鞋底煮食之又盡乃掘鼠羅雀及殺老弱以食猶大破賊兵旣圍攻七閱月奉國又治攻具親來撲晝夜不息俄穴城百餘所或魚貫梯城而上伯顏不花的斤登城百道拒之已而士卒疲不能戰萬戶顧馬兒以城叛信州遂陷席順出降伯顏不花的斤歎曰吾義不可辱遂自刎大聖奴海魯丁皆死之部將蔡誠盡殺妻子及蔣廣奮

力巷戰誠遇害廣爲奉國所執愛廣勇敢使之降廣曰吾甯爲忠死不爲降生汝一盜耳吾豈屈汝乎賊怒磔廣於竿大罵而絕有陳受者信小民也以勇募爲義兵被禽痛罵不屈賊焚殺之先是伯顏不花的斤之援信州也嘗南望泣下曰我爲天子司憲視彼城之危急忍坐視乎吾知上報天子下拯生民餘皆無可恤所念者太夫人耳卽日入拜其母鮮于氏曰兒今不得事母矣母曰爾爲忠臣吾卽死復何憾鮮于氏太常典簿樞之女也伯顏不花的斤因命子也先不花奉其母閒道入福建以江東廉訪司印送行御史臺遂力守孤城而死諡曰桓敏

全普庵撒里畏吾兒人或曰釋教都總統乞台薩理之後也世系見阿魯渾薩里傳普庵撒里初爲中書省檢校時太師汪家奴擅權用事臺諫無敢言者普庵撒里獨於眾中歷數其過諤諤無懼

色拜監察御史卽首劾汪家奴十罪遂見黜然氣益振歷詆權貴朝臣莫不畏慄出爲廣東廉訪使召拜兵部尙書未幾授贛州路達魯花赤摘發奸惡一路肅然俄潁州盜起普庵撒里卽修築城壘發公帑募勇士得三千人練習皆可用屬邑有被陷者輒遣兵復之境内悉安拜江西參知政事仍分守贛州時江西下游諸郡皆爲陳友諒所據乃與總管哈海赤戮力同守已而賊將幸文才率兵圍贛使人誘降普庵撒里斬其使日擐甲登城拒戰凡四閱月兵少食盡義兵萬戶馬合沙欲舉城降賊普庵撒里不從遂自剄朝諡曰儆哀哈海赤守贛尤久城陷賊將脅之降哈海赤曰與汝戰者我也爾賊毋殺贛民當速殺我遂見殺

宋里不花字端甫蒙古人由宿衛累官遼陽平章政事陳友諒陷江西詔徙江西行省遂泛海南下趨廣東駐師揭陽降土寇金元

祐招復循梅惠三州承制官其酋長俾治賦以給兵食又別規粟四千石輸送京師自是英肇欽連諸郡皆附且治兵由梅嶺將赴江西而元祐有異志託以鎮服其土遮道固留先是制書命劉巨海僉廣東元帥府事未發元祐竊取易其名私畀徭劉文遠誘與偕亂事覺文遠伏誅而元祐及其弟元泰子榮竄匿不獲俄榮帥外賊突入奪符信殺官吏變起倉猝朵里不花爲槍所中子達蘭不花率麾下力與抗死之朵里不花遂被執擁至太平橋罵不絕口遂見害其妻卜顏氏妾高麗氏在側不去皆大罵曰我平章遇爾父子厚何暴逆至此亦皆見殺其部將哈乞吳普顏阿刺不花歹不花等俱戰死

王士元字堯佐恩州人泰定四年進士累遷知磁州值軍興事繇士元惟惜民力雖被將士訶責弗顧也尋調知濬州州濱黃河嘗經盜賊雉堞不完市井空荒士元邑邑不得志俄賊復迫州州兵悉潰士元坐堂上顧其子致微使避賊曰吾守城居此職也若可行乎子侍立不忍去賊前問曰爾爲誰士元叱曰我王知州也賊不識我耶賊欲縛之士元奮拳毆賊賊怒竝其子見殺其時大名入卞琛早游學京師補國子生歸里寇至其境琛與從子小十府史李仲亨等集丁壯出擊然惟以鉤鉏白挺當賊賊矢雨集眾潰被禽小十仲亨皆死賊素知琛名謂曰從我解汝縛否則殺汝琛曰我國子生也視汝直狗彘耳遂見殺又湯陰人劉以忠字恕夫以賊侵避之林縣鹿嶺山群盜襲得之欲以爲主擁坐盤石上而羅拜之以忠曰我書生也不能爲國討賊反附之乎遂以頭觸石賊忿怒殺之又扶溝進士潘炎賊欲以爲學士觸柱死

楊椿字子壽眉山人也徙居吳中教授自給張士誠渡江行省強

起爲義軍府參軍守齊門寇奄至眾皆遁去城陷椿猶躍馬呼其子若有所指授者追者及之椿猶挺身力戰刃交於胸瞋目怒罵父子俱死城下妻王氏披髮徒跣求於亂尸中不得循河而慟忽其尸自水躍出因載以歸大慟三日亦死時有楊乘周貞皆貞士也乘字文載渤海人初尹介休民饑散爲盜乘立法招降之累官江浙行省左右司員外郎坐事免寓居松江士誠旣入平江其徒郭良弼董綬交推之士誠因遣張經招乘乘曰良弼董綬皆名臣今已失節顧欲引我以分謗耶且讓經平日讀書云何經俛首不能對乘日與客痛飲無一言客問盍行乎乘曰乘以一小吏致身顯官有死而已經促其行愈急乘命其子具牲醴告祖禰迨暮起行後圃顧西日晴好慨然曰人生晚節如是足矣夜分乃整衣冠自縊死周貞字子固其先汴人後徙儀真爲人倜儻負奇氣初被薦

且北行望江歎曰仕以濟人耳人苟濟矣何仕爲於是居吳淞江上以善醫聞然雅不以泉幣市王公大人每卑禮延致貞視之漠如也而長身美髯善談笑款客無纖毫儉嗇意卽有饋遺輒取以周人之急人不能測也晚因采藥吳中留馬士誠陷平江貞年八十有三杜門堅臥九日不食飲卒又張士誠圍常州萬戶府知事劉良遣其子毅賚蠟書間道抵江浙求救未及還而城陷良一門赴水者數十人武進縣尹劉溶獨率民兵戰於葛橋南死楊完者字彥英武岡綏甯人也世爲土官江浙屢劾於寇議者謂苗軍可用乃請於朝至寶慶招完者至以爲海北宣慰使都元帥張士誠陷平江嘉興告急行省左丞相達識帖睦爾遂檄完者守嘉興進江浙參知政事完者以數萬眾屯嘉興而遣先鋒呂才以七千人屯王江涇商旅不行軍容甚盛士誠弟士德帥師本欲謀

省會畏之不敢前乃自平望烏敦直擣杭州達識帖睦爾既已遣完者則漫不設備寇突至城陷遂遁賴萬戶普賢奴猶力拒完者遽自嘉興三道來援連敗士德於皋亭於謝清於央城巷賊遁去達識帖睦爾乃還完者以功遷本省右丞既而士誠復遣其將史文炳以水師數萬攻嘉興完者預遣人至杉青東西岸積葦以待而以大軍四伏使小舟數百十艘餌之賊檣艣蔽天排江而下追至杉青岸上乘風舉火賊舟焚燎至四十里不止死者甚眾遂舍舟登陸又戰於冬瓜堰大破之然完者自是益驕因勦達識帖睦爾以娶平章政事慶童女慶童不得已許之達識帖睦爾本倚完者爲重久亦甚厭之未幾士誠以數敗僞請降完者勸達識帖睦爾納之士誠知不圖完者杭不可取也遂遣史文炳謁完者相見甚歡文炳大設宴盛陳金銀器皿嵌金鐵鞍之類盡以遺之自是

約爲兄弟達識帖睦爾陰約士誠以兵攻完者會完者與明人爭徽州建德不利乃陽言使士誠出兵復建德完者營杭州城北曰德勝堰不知其謀已也既而文炳兵至猝被圍完者拒戰十日力盡自經死其弟伯顏亦自殺完者治軍無紀律往往爲民害人以此少之然猛勇敢戰完者死而杭亡於士誠達識帖睦爾亦橫死矣其後朝議贈完者潭國公諡忠愍伯顏衡國公諡忠烈

伯顏師聖字宗道其先哈刺魯人也後居濮陽生三歲常以指畫地若爲卦六歲從里師授孝經論語卽成誦蚤孤兄曲出購經傳諸書資之日夜誦不輟長而受業宋進士黃坦坦大器異之因命以伯顏爲氏且名而字焉久之學日進從游者亦日眾至正四年以隱士徵授翰林待制預修金史既辭歸復起爲江西廉訪僉事數月復以病免師聖爲學務真知力踐士出其門不問而知其出

於伯顏氏也又久之紅巾蔓延河北師聖言於省臣將團結鄉民以自保而賊大至師聖乃渡漳北行邦人從之者數十萬家至磁州忽遇賊賊知其名生劫之不屈引頸受刀乃與妻子俱被害既死賊剖其腹見其心數孔因詫曰古稱聖人心有七竅此非賢士乎乃納其心於腹中覆牆而揜之於是太常諡議曰以城守論之伯顏無其責而死與李黼同以風紀論之伯顏無其責而死與張桓同乃古之所謂君子人者因贈僉太常禮儀院事諡曰文節是時儒生死難者有喬彝顏瑜趙洙之屬彝字仲常晉甯人少時高介有名紅巾襲晉甯城陷城中死者十二三彝整衣冠聚家人坐井上令妻子輩循次投井中而已隨之彝既死賊渠王士誠使人至其家邀致之至則已死矣朝議贈臨汾尹諡曰純潔瑜字德潤曲阜人顏子裔孫以行誼舉教諭田豐起山東瑜攜家走鄆城道

遇賊脅之以見主帥瑜罵曰爾賊何主帥耶賊怒欲殺之瑜無懼色復使之寫旗瑜大詬之賊以槍刺瑜至死罵不絕口妻子皆爲所害洙湯陰人官遼陽儒學提舉城破被執欲使降洙叱曰我爲儒官職司名教豈肯從汝爲逆者賊怒殺之繼執其妻許氏左丞有壬兄弟子也賊嚇之以刃許罵曰吾母與兄弟居武昌者皆死於賊今吾夫又死焉使我得報當醢汝矣賊竝殺之時又有曹彥可者亳州人盜起多田野無賴目不知書既破毫揭帛於竿皆羣趨彥可家劫之使寫旗迫以刀斧不顧遂見害有司上其事中書給貲以葬諡曰節愍又有汾州張岳起傅霖晉甯王佐元輔龍溪陳元善諸暨胡存道師善建昌吳德新止善皆以節名岳起嘗爲國子助教免歸州陷與妻赴井死佐見獲不屈死元善世以儒名家海壩逃兵作亂以其名望欲脅之降元善曰吾所畏者義不畏

者死汝賊豈能久生耶遂與妻郭氏及三子皆遇害存道以進士教授松江適苗兵焚掠獨守學舍不去賊怒殺之廟得免災死先一日題其壁曰銜命來分教臨危要致身但圖存聖像不愧作儒臣郡人祀之先賢堂德新工醫留京師偶往晉甯值盜至見執加刃於其頸罵不已乃曳之井上陽欲擠之德新卽自投井中仰罵賊下射矢貫其頂罵益力賊怒以長槍刺之死然亦悲壯之以土埋井而去

王英字邦傑益都人也性剛果有大節膂力絕人襲父職爲莒州翼千戶父子皆善雙刀號刀王自世祖成宗之世征討江西諸賊屢立戰功累官至同知海北海南道宣慰司事後至元初討平萬安吳汝期之亂未幾李志甫起漳州劉虎子起潮州方是時英已致仕平章政事伯撒里謂僚佐曰是雖鼠竊狗偷然非刀王行不

可其人雖難起可以義激也乃遣使迎致之英曰國家有事吾雖老豈可坐視乎據鞍橫槊精神飛動馳赴焉及賊平英功居多毛貴陷益都英年九十有六矣憤甚因呼其子宏謂曰我世受國恩美官厚祿備嘗享之今老矣縱不能事戎馬以報天子尙忍食異姓之粟以求生乎水漿不入口者數日遂卒毛貴聞之使具棺衾以葬將斂舉其尸不動焚香祝曰公子宏請公歸葬先塋尸乃起觀者莫不驚異山東宣慰使普顏不花及憲司請卹典於朝曰不食寇粟餓死芹泉有夷齊之風爲臣之清者也芹泉谷名英所居也是時膠萊守臣釋家訥僉書樞密院脫歡陵川縣尹張輔臺幕張祖信及般陽總管淄川張名德皆以拒毛貴死

郭嘉字元禮彰德林州人也祖昂有傳父惠江西廉訪司僉事附見昂傳嘉以累世備文武爲人慷慨有大志泰定三年成進士遷

翰林國史編修累拜監察御史朝廷以海寇欲於浙東諸路立水軍萬戶鎮之論莫能定乃擢嘉禮部員外郎乘驛至慶元與江浙行省議之嘉詢父老知其弗便遂請罷會方擇守令綏靖遼東乃授嘉廣甯路總管兼諸奧魯勸農防禦時軍旅數興供餉無虛日民苦糴及轉輸而吏胥復因緣爲奸嘉設法計戶口第甲乙民甚便之有詔團結義兵嘉招集民數千教以坐作進退號令齊一賞罰明信故東方諸郡頗稱能兵旣而紅巾自大同焚掠上都嘉帥義旅出禦而遼陽已陷孤城無援嘉竭財物犒義士以勵之且曰自吾祖父有勳王室今之盡忠吾分內事也况身守此土當死生以之餘不足恤矣頃之賊至圍城互數十里有大呼者曰遼陽我得矣何不出降嘉挽弓射中呼者左頰墮馬死賊稍引退嘉開西門逐之賊大至力戰以死詔贈崇化宣力効忠功臣資善大夫河

南江北左丞上護軍太原郡公諡忠烈

普化帖木兒字遷善甘肅平章政事鐵木哥之子也鐵木哥有傳普化帖木兒累官南臺御史大夫張士誠旣遷江浙左丞相達識帖睦迺於嘉興以弟士信代其位又使人諷行臺爲之請朝命授以眞王普化帖木兒不從士誠卽使人至紹興索其臺印普化帖木兒封其印置諸庫曰我頭可斷印不可與又迫之登舟曰我可死而不可辱也從容沐浴更衣與妻子訣賦詩二章乃飲藥死臨終擲杯地上曰我死逆賊當繼我亾也其時泰和曾貫傳道爲紹興路照磨以善周易名監州慕其節概辟禦龍泉寇倉卒閒受命戰於觀背死之

劉鶚字楚奇信州永豐人也少力學久而聲稱益著乃築浮雲書院以教鄉族子弟割田廩食焉浮雲者言富貴如浮雲也其後以

薦充揚州學錄擢提舉湖廣儒學時學田若干畝爲有力所據者三十年鶚言於臺省而復之未幾入爲秘書郎鶚好吟咏常與虞集揭傒斯歐陽原功等相唱和久之進爲翰林修撰出爲江州總管遷廣東廉訪副使鎮韶州乃修城池繕甲兵擢本道宣慰使都元帥少子運亦以功爲副元帥屢卻賊氛民恃爲保障進本省參知政事旣而韶洞獠作亂鶚分兵討之疏請益師不報而贛賊數萬猝至父子親冒鋒鏑禦戰數月兵困城陷運先陣亡鶚被執幽於贛州慈雲寺終罵賊不屈而死粵人爲立憲節祠焉

趙資逸其里籍累官參知四川政事時明玉珍已陷重慶資與右丞相完者都平章政事郎革及屯嘉定圖復重慶而玉珍遣將來攻因退守大佛寺賊入嘉定郎革及妻赴水死因執資妻子於江岸招之降資曰癡婦不死何爲汝不見平章婦乎卽以強弩射殺

其妻復欲射其子爲眾擁去已而大佛亦陷資三人會於龍州集義旅謀興復爲游兵執至重慶玉珍欲官之館於治平寺使人諭意再三資曰國破家亡惟祈速死玉珍猶欲生之俄傳趙參知義兵將至於是斬三人於市蜀人以爲三忠立祠祀焉

馮文舉什邡人初爲漢川學正以達魯花赤宴僚佐舉觴不敬慚而去俄成進士提舉雲南學校明玉珍攻雲南文舉謂妻馬氏曰我元進士汝光州馬中丞孫女也天運至此能同死乎氏曰夫旣殉國妾生何益乃焚香北叩相對縊於學宮副提舉爕理翰聞之憮然曰吾其可獨生乎亦整衣冠自經而死

向景仁施州人世亂景仁父紹榮召集鄉民守禦本州大將奏署元帥府事明玉珍據重慶屢遣人招紹榮喏以官爵不應遣將來攻紹榮敗之時其副譚登密通賊以城降紹榮遂遁入蠻中景仁

與弟庭芳收餘兵從征湘漢有功庭芳授夔州總管隨征新建戰死景仁並領其眾守鐵寨城城陷不屈死

普顏不花字希古蒙古氏爲人倜儻有大志至正五年右榜進士第一授翰林修撰遷江西左右司郎中佐道童禦斬寇江西得完語在道童傳數歲歷江西廉訪副使益都達魯花赤山東廉訪使入參知政事詔與治書侍御史李國鳳經略江南至建甯陳友諒黨鄧克明來寇而平章政事阿魯溫沙皆夜遁國鳳時分鎮延平城陷亦遁去普顏不花曰我銜命來此去將何之乃命築各門甕城前後拒戰六十四日旣而大敗賊眾明年召還授山東宣慰使再轉知樞密院事平章山東政事守禦益都明兵壓境普顏不花捍城力戰城陷同僚保保出降普顏不花還告其母曰兒忠孝不能兩全有二弟當爲終養遂拜母出官舍坐堂上明將徐達聞其

賢召之再三不往旣而面縛之終不屈死先是其妻阿魯眞歷呼家人告之曰我夫受國恩我亦封齊國夫人今事至此惟有死耳已而二弟婦亦各抱幼子及婢妾溺舍南井死井填咽不可容遂抱子投舍北井死其女及妾孫女皆隨溺焉時山東僉事博興齊郁分守益都與宣慰副使于德文總管胡濬知行樞密院張俊皆自經俊妻子亦自投井中死又有申榮者以平章山東政事守東昌見列郡皆降告其父以當死國事遂自經死又是時樂安張士謙河南靳義皆烈士也士謙以南臺御史治婺源州明兵至力守五十餘日城破被執先戮其妻脅之降士謙曰吾爲國效忠豈畏死耶遂被害贈清河縣伯義守太平明兵渡采石赴水死又吳訥字克敏休甯人至正末爲義兵萬戶與明兵戰敗不屈死著述在

藝文志

元書

卷九十二 忠節傳下

七

柏帖穆兒字君壽蒙古人累官福建左右司郎中明騎兵出杉關取邵武以舟師由海道出閩奄至城下柏帖穆兒知城不可守引妻妾坐樓上慷慨謂曰丈夫死國婦人死夫義也今城且陷吾必死於是若等能從吾乎皆泣曰無不死於是縊而死者六人有十歲女度其不能自死則給之曰汝稽顙拜佛庶保我無恙也甫拜卽挈米囊歷之死乳媪抱其幼子旁立以泣柏帖穆兒熟視歎曰汝三歲兒死生於義何如爲宗祀計可也乃命媪抱匿旁近民舍有頃城陷卽舉燈自然四圍窗火大發遂焚死時閩人謂陳友定柏帖穆兒迭里迷實爲三忠友定自有傳

迭里迷實字子初回回人性剛介事母至孝年四十猶不仕或問之曰吾不忍舍母以去也以宿衛年勞授行宣政院崇教擢監察御史建言疆宇日蹙兵律不嚴陝西汴梁淮潁山東之寇有窺伺

燕趙之心宜急選將練兵信賞必罰共圖克復之宜預定守禦之策不報出爲漳州路達魯花赤三年民甚安之明兵旣取福州興泉相繼納款迭里迷實仰天歎曰吾不才位三品國恩厚矣報國者惟有死耳無何吏走白招諭使者至請返之迭里迷實曰汝第往吾行出矣乃具公服詣聽事北面再拜畢引斧斫其印文又大書手版曰大元臣子卽入位端坐拔所佩刀割喉中以死旣死猶手執手刀按膝坐儼然如生郡民相聚哭庭中斂其尸葬東門外時又有獲獨步丁者亦回回人由進士累官廣東廉訪司僉事有呂福者爲江西行省都事皆聞寓福州復以行省命攝長樂令福州旣下獲獨步丁曰吾兄弟三人皆忝進士受國恩四十年今雖無官守然大節所在其可辱乎以石繫腰投井死福亦曰吾世食君祿今雖攝官若不以死報國則無以見先人於地下引繩自經

死獲獨步丁兄曰穆魯丁官建康曰海魯丁官信州先是亦皆死國難云

鄧祖勝以右丞守永州明兵圍其城屢戰不勝食且盡或勸祖勝暫出以圖後效祖勝慨然曰吾受封疆之寄保釐南邦才力謏薄以至此有何面目復視息人間乎遂自殺都事趙元隆者興安奇士也素尚氣節嘗讀書至士爲知己者死撫几歎曰烈士當如此矣及永州破祖勝死乃私謂同官曰吾荷鄧侯知遇每期效尺寸以報今尙可獨生乎亦自殺

也兒吉尼字尙文唐兀氏累官平章廣西政事初紅巾入湘南嶺表震動乃議繕城池扼險要捐俸於官懋易海鹽積以歲月息倍至萬經制之費皆出於比民忘其勞又善結眾心一時驍將才士多歸之故保有境土二十餘年明兵攻廣西也兒吉尼倚西濠水

爲固堅壁不下明兵決濠水築土隄五道傅城亦不下會總制張榮約降城破被執入集慶不屈死部下陳瑜劉永錫曾尙賓皆全家自殺

朴賽因不花字德中高麗人也有膂力善騎射初爲速古兒赤累官同知樞密院事翰林學士承旨賜虎符兼巡軍合浦全羅軍民萬戶都元帥除大司農出爲嶺北平章政事會皇太子撫軍冀甯承制復拜承旨遷集賢大學士又爲宣政院使遂拜中書平章政事明兵逼京師詔賽因不花守順承門所領纔數百羸卒而已乃歎息曰國事至此吾當與此門同存亡也城陷不屈被殺是時有張庸者字存中温州人性豪爽精太乙數會世亂以策干經略使李國鳳因承制授福建員外郎治兵杉關頃之計事赴京師擢祕書少監皇太子立大撫軍院命庸團結房山就除刑部尙書會諸

寨設守駱駝谷乃遣從事段禎求援於擴廓帖木兒不及報庸獨
堅守拒戰眾將潰庸無去志已而寨民李世傑執庸出降與禎同
被害

丁好禮字敬可真定蠡州人也精律算初試吏於戶部辟中書掾
累擢監察御史除戶部侍郎京畿漕運使建議置司通州講究漕
運利病著爲成法人皆便之拜戶部尚書能樽節浮費以給國用
拜參知政事時京師大饑天壽節廟堂欲用故事大譙會好禮曰
今民父子有相食者君臣當修省以弭大患故事不可循也不聽
乞罷乃以集賢大學士致仕給全俸家居擴廓帖木兒從皇太子
還京師輸山東粟以遺朝貴饋好禮麥百石不受明年復起平章
政事尋以議論不合復謝政去特封趙國公明兵入京師或勸其
謁大將好禮叱之曰我以小吏位極品爵上公今老矣恨無以報

國所欠惟一死耳後數日大將召好禮不肯行昇至齊化門抗辭
不屈而死年七十五郭庸字允中蒙古人由國學生釋褐出身累
遷西臺御史與同列劾知樞密院事也先帖木兒喪師忤丞相脫
脫左遷中興路判官其後也先帖木兒以罪黜召拜監察御史累
拜參知政事是日亦昇至齊化門眾叱之拜庸曰死自吾分何拜
之有亦不少屈而死

閔本字宗先河內人也性剛敏刻志爲學早歲得推擇爲禮部令
史辟御史臺掾平反冤獄甚有聲擢樞密院都事拜監察御史歷
吏刑戶尚書皆以能見稱本素貧且有目眚上章乞謝事不允詔
授集賢侍講學士明兵薄京城本謂其妻程氏曰國事至此吾知
之久矣愧不能立功補報敢愛六尺軀苟活哉程氏曰君能盡忠
我尚有愛於君乎本乃朝服與程氏北向再拜大書屋壁曰元中

奉大夫集賢侍講學士閔本死此遂各縊焉二女曰眞眞曰女女呼天號泣亦自縊於其側有拜住者康里人也字聞善以材累官至翰林國史院都事遷太子司經明兵至拜住謂家人曰吾始祖海藍伯事王汗遂不忍改事太祖吾祖生朔漠尚守義如此今吾生長中原讀書國學可不知大義乎遂赴井死其家人瘞之舍東悉以其書籍焚之爲殉云

趙宏毅字仁卿眞定晉州人也少好學家貧無書備於巨室晝則爲役夜則借書讀之嘗受經於吳澄辟翰林院書寫累遷國史院編修調大樂署令明兵入京師宏毅曰我力不能救社稷豈不能以死報國乎乃與妻解氏同縊死子恭爲中書管勾與妻子訣曰今乘輿北奔我父子食祿不能效尺寸况吾父母已死尙何顧恤或止之曰卑官何自苦如此恭叱曰爾非吾徒也忠義人各自盡

豈問官之崇卑乎遂公服北面再拜亦縊而死恭女官奴年十七見父死方大泣適鄰諸媪來約出避曰我未適人避將何之人生便百歲亦須一死耳乃入中堂解衣帶亦自經死徐猱頭者大都人京城陷妻岳氏告曰我等將被驅迫奈何猱頭曰事急矣惟有死耳遂火其所居夫婦挽手同投烈焰中母王氏及二女一子見之號慟不已亦抱持赴火死

王遜志字文敏翰林學士王惲曾孫也惲有傳遜志以廕授侍儀司通事舍人歷監察御史出爲江西廉訪副使召僉太常禮儀院事明兵逼京師天子命太常禮儀院官載太廟神主從皇太子北行院使陳祖仁及遜志不可語在祖仁傳及京師陷公卿爭出降遜志獨家居正衣冠而坐其友中政院判官王翼來告曰新朝寬大盍出詣官言狀遜志斥之曰君旣自不忠又誘人爲不義耶因

戒其子曰汝謹繼吾宗卽日投居賢坊并死

黃昇字殷士撫州金谿人也博學明經尤長於詩賦用丞相太平薦授淮南行省照磨未行除國子助教歷太常國子博士監丞擢翰林待制兼國史院編修京城既破昇歎曰我以儒生出身累蒙國恩爲冑子師代言禁林今縱無我戮何面目見天下士乎遂赴井死著述見藝文志

伯顏子中其先西域人後仕江西因家焉遂爲進賢人也子中明春秋五舉至正鄉薦辟長東湖書院遷建昌教授子中雖儒生慷慨喜談兵江西盜起參知政事全普庵撤里分省贛州署爲都事陳友諒兵攻贛子中適出募兵助守備會城陷聞道奔閩帥陳友定素知之辟授行省員外郎出奇計以友定兵復建昌浮海如京師獻捷累遷兵部侍郎持節發廣東何真兵救閩至則真已降

於明將廖永忠子中墮馬折一足致軍前永忠欲脅降之不屈永忠義而舍之乃變姓名冠黃冠遁迹江湖聞明主求之不得簿錄其妻子子中竟不出嘗齋鴛自隨曰此所以志也久之事寢解乃往來進賢之北創竹室以居洪武十二年明撥遺逸布政使言於朝以幣聘之使者至子中太息曰死晚矣卽具牲醴祭其先與昔時其事死節之士作七哀詩飲鴛而死

王翰字用文初名那木罕其先靈武人唐兀氏元初從下江淮授領軍千戶鎮廬州因家焉翰年十六領所部有能名除廬州路治中累官福建行省郎中陳友定留居幕府表授潮州總管兼督循梅惠三州福州陷翰浮海欲抵交趾不果屏居永福觀獵山自號友石山人籜冠卉服葛屨繩帶與樵童牧豎田夫漁父雜處翰本將家子志匡時難不幸遭國家顛沛其慷慨激烈之氣往往託之

聲詩人皆悲之久之明辟書至歎曰女其可再適人哉乃以幼子稱託其故人吳海遂自殺

蔡子英永甯人也至正進士察罕帖木兒開府河南辟參軍事累官至行省參知政事順帝北狩子英從擴廓帖木兒走定西軍復敗子英單騎走關中入南山明主聞其名使人繪形求得之傳詣建康至江濱亾去變姓名賃舂久之復被獲械過洛陽見明將湯和長揖不拜抑之跪不肯因以火熱其須不動其妻適在洛請與相見子英避不肯見明主見其至命脫械以禮遇之授以官不受退而上書詞旨偉惋明主益重之館之儀曹忽一夜大哭不止人問之曰思舊君耳明主命有司送出塞俾往和林焉是時有陳高者字子上温州平陽人至正進士授慶元錄事自免去方國珍據浙東欲招致之不可得再授慈谿縣尹亦不起平陽陷乃棄妻

子往來閩浙間自號不繫舟漁者後浮海過山東謁見總兵擴廓帖木兒於懷慶密論江南虛實擴廓帖木兒喜欲官之會疾作卒又有魯淵字道源純安人至正進士出爲華亭丞新安失守行省檄淵與監郡脫脫引兵而西焚賊六十餘壘遂會大軍於興安與富山巡檢邵仲華共守豪嶺賊再犯眾驚幾潰淵以忠義相激始定已而賊大至遂敗見執抗辭不屈賊羈之於白石源淵吟詠自若豫作自祭文誓以必死其後賊敗乃得脫歸以春秋傳學者號爲岐山先生復起爲浙江儒學副提舉以疾免明初累徵不起竟以壽終

論曰傳曰子之能仕父教之忠古之誼也抑魏徵曰當使臣爲良臣毋爲忠臣余以爲非忠則不能爲良也何也人所欲莫甚於生所惡莫甚於死知所欲之有甚於生所惡之有甚於死則可以爲

元書卷九十二
人臣矣故使范質而爲文天祥不可也使文天祥而爲韓琦富弼
奚不可哉

尹智溪 刊

劉世昌 刊

門人曾紀霖襄校

門人曾士琮詳校

元書卷九十二下

元書卷九十三

邵陽曾廉讓

孝義列傳第六十八

余觀商鞅書有言國有禮樂詩書善修孝弟廉辨十者必削至亡
國無十者必興至王嗚呼余於是而知秦之所亟滅而鞅之惡雖
車裂不足以蔽其辜也何則夫孝者天之經也地之義也民之行
也有子曰其爲人也孝弟而好犯上者鮮矣不好犯上而好作亂
者未之有也故孝弟爲人之本而求忠臣必於孝子之門且夫禮
樂詩書商鞅固不足以知之所謂對爰居而奏鼓鐘也若孝弟者
則人不生於空桑豈有不懷生鞠顧復之恩是則苟列人類未有
不知孝弟之爲美者也而鞅以爲必削且亡則鞅且慘過梟獍矣
蓋鞅之意欲盡驅天下之民專於耕戰而不知人不能事其父則

未嘗有能事其君者也故陳涉一呼天下遂土崩瓦解由民之皆路
人其骨肉則雖誅絕而不足恤誅絕而不足恤則雖嚴刑亦無以
制之也老子曰人不畏死奈何以死懼之商鞅者但知以死懼人
而自啟以不懼死之道則惡得而不犯上作亂也哉由是觀之削
耶興耶亡耶王耶鞅之言如此而其事如彼此其明效大驗彰彰
者也是故炎漢懲秦之弊首開孝弟力田之科孝武廣勵學校之
路其補博士弟子必好文學敬長上肅政教出入不悖所聞東京
而後益振此旨風俗醜矣下至六代政教斯墜而人重至行天下
清議未之有衰也唐時猶循漢軌浸淫及於五季大號爲悖亂而
宋復修之以逮於元雖權輿朔漠而親親尊尊之意不異於中夏
也蓋天有至道人有至性孟子曰性善則互古今徹遐邇無有乎
弗具無有乎弗同者也商鞅之邪說豈足以動之哉吾甚怪乎天

壤之內誰非人子儼然揚鞅之論而不惴也富強何時而社已屋
矣豈不痛哉說者徒知犯上作亂之禍民困塗炭而惡知其棄孝
弟以致此也若夫義者則亦人之所當爲古人之所視爲固然者
也而後之人之不能也則不可不以義名也然與墨子之摩頂放
踵其相去亦遠矣余美元時至閭井細民皆好敦內行詩曰民之
秉彝好是懿德故錄百四十餘人以爲孝義傳明孟子性善之論
焉

蕭道壽京兆興平人家貧鬻箴以自給事母盡禮每旦夫婦親侍
盥櫛日三飯必待母食然後退就食夕必待母寢然後寢出外必
以告母乃敢出母性嚴急或怒欲罰之道壽自進杖伏地受之起
復再拜謝違教拱立左右俟色霽乃退母嘗有疾醫累歲不能療
道壽割股進之而愈至元八年賜羊酒表其門

匡國政邳州人父才仕金爲邳徐兵馬都巡使金亡帥所部歸國
屢戰淮北破宋兵授沂邳東阿元帥憲宗元年宋兵入境戰不利
死之妻高氏被斫不死年始三十五撫孤國政方六歲一日宋兵
忽暴至母子相失氏冒鋒鏑求於亂屍中卒幸全中統三年李璿
叛國政母子又爲宋兵所俘居之淮安宋亡乃率三百餘戶北歸
屢遷睢州判官虞城縣尹所至以廉惠稱事母尤極孝母年五十
疾甚刲股活之復疾又刲股後數載又疾又刲腦和藥以進疾竟
愈母年八十九而終國政廬墓終喪有喪時至若所素豢者郡邑
聞而異之曰父死忠母守貞子盡孝有一猶難况兼之乎上其事
表其里曰貞孝

尹莘汴梁洧川人也至治初游學京師忽夢母疾心怪之馳歸母
已亡居廬蔬食哀毀骨立每鷄鳴起手治祭饌詣墓所哭奠之風

雪不廢父輔臣嘗病疫莘侍奉湯藥衣不解帶嘗其糞以驗差劇
夜則禱天請代父死數日而愈又有高唐孫希賢母病痢希賢閱
方書有曰血溫身熱者死嘗之而溫乃號泣祈天求身代之母遂
愈又高郵卜勝榮母痢不能藥日嘗痢以求愈兄疾禮北斗乞減
已年延之並痊

劉通亳州譙人也家貧力耕母卜氏好聲樂每眩技者以簫鼓至
門必令娛侍或自歌舞以悅母心卜氏目失明通誓斷酒肉禱之
三十年不懈卜氏年八十五忽復明又至大間鄱陽黃鑑皇慶間
諸暨丁祥一至治閒吳丁越及延安王思聰皆親喪明以舌舐之
復能視並命衰表

張旺舅安豐霍邱人幼失父母陳氏居貧守志旺舅九歲賣錫以
養及長母病數月無力延醫惟日夜痛哭禮天求代未幾遂愈量

力不給遂不娶以終母年縣為請旌於朝

葛守德字仲謙清苑人母病痿在牀數十年衣帶筋七必躬奉之不以屬諸人身處蔬淡奉養極溫旨母忘其貧燕南使者欲薦之於朝守德不忍離其親辭疾不起乃俾師鄉校後教授中山保定二郡車載母以行徒步推挽一日醉歸母不悅輒戒不飲非尊者賜未嘗染唇母歿後其兄利分爨力諍不能得恣其所取不與校兄寔且老復迎歸養死嫁其孤女至正之季盜起中原舉家避難唐明府山采樵以食忽逢大風西南來若萬馬奔者家人懼走逃匿既而賊至餘皆遇害守德家獨存焉

梅應發居吳郡閭門市中天性純篤母嘗疾醫不能療則剔股肉食之疾良已他日母又有疾危甚更求良藥皆弗效乃露立稽首燃頂灼臂乞減己年以益母壽是夕天將雨陰雲四合俄剗焉而

開若啟半扉見北斗止六星頃之雲復合應發還至母所則母已擁衾坐牀上言有衣白衣者六人來以水來灌灑遂霍然而蘇詰旦平復如故年八十餘益強士大夫多為詩美其事又朱良吉常熟人母年六十餘病將死良吉沐浴禱天以刀剖取心肉一嚙煮粥飲母病愈良吉心痛就榻不可起一夕忽有異僧過其家為納其心以桑皮綫縫合未及期月亦愈胡伴侶密人父嘗患心疾莫能療伴侶乃齋浴告天割右脇旁脂一片和藥以進父疾遂瘳又山陰陳福年十歲割股療母疾股割而母已死人呼曰孝童又有撫州總管管如林渾州朱天祥潭州九歲童子李家奴並以母疾割股旌其家

王薦福甯人性孝而好義父嘗疾甚篤夜禱於天願減己年益父壽父絕而復甦告其友曰適有神人黃衣紅帕首恍惚語我曰汝

子孝上帝命錫汝十二齡遂愈後果十二年而卒母沈氏病渴語薦曰得瓜以啖我渴可止時冬月求於鄉不得行至深奧嶺值大雪薦避雪樹下思母病仰天而哭忽見巖石間青蔓離披有二瓜因摘歸以食母而渴頓止兄孟齡早世嫂更適劉仲山劉嘗以田鬻於薦及死不能葬且無子族以其貧莫肯爲之後薦卽以田還之州禁民死不葬者貧民遂焚柩棄骨野中薦哀之以地爲義阡收瘞之至大四年其鄉大旱薦盡出粟振之粟竭卽以己田易粟給之人會佛祠爲之祈福福建宣慰使上狀旌之又有湯霖龍興新建人早喪父事母至孝母嘗病熱苦思冰時天時正燠霖不能得冰每日號哭忽聞池中憂憂有聲拭淚視之則冰也亟取奉母疾果愈又永平龐遵母病腫三年不能起忽思食魚遵求之市不得歸途歎恨忽有鯉躍入其舟作羹以獻母悅尋瘥又陸思孝山

陰樵者母病痢醫禱不效欲刲股忽夢寐閒恍惚若有神授藥卽以奉母疾亦立愈又黃道賢泉州人嫡母唐氏無子道賢在襁褓而生母蘇以疾出旣長屢請於父得召之歸道賢竭力養二母得其歡心父病篤道賢夜禱天願減己算一紀以延父壽遂愈至元統二年乃歿亦符一紀之數道賢廬墓蔬食終制後至元二年旌曰孝子黃氏之門

丁文忠許州鄆城人業鼓冶母疾與弟文孝竭力調侍母卒文忠廬墓側不與妻面者三年及父疾醫不能療文忠造車一兩兄弟共御父以禱於嵩山五臺泰岱河瀆諸祠途遇異僧遺藥而愈延祐七年旌之

李忠晉甯人幼孤事母至孝大德七年城大震郇保山移行空中所過居民廬舍皆摧壓傾圮將近忠家分爲二行五十餘步復合

忠家獨完又雷州吳國寶性孝友父喪廬墓大德八年境內蝗惟國寶田無損人以爲孝感焉

李茂大名人徙家揚州母孟氏嘗病目瞽茂禱於泰山三年復明又每夕祝天乞損己年以益母壽孟氏竟年八十四而歿茂居喪哀痛聞者傷之大德九年揚州再火延燒千餘家火及茂廬皆風返而滅詔旌之又余丙建德人幼喪母泣血成疾父亡不忍葬結廬古山下殯其中日閉戶守視有牧童遺火延殯廬丙與子慈亟撲不止欲投身火中與柩俱焚忽暴雨火滅

宗祀大都人年十九父卒擗踊號泣絕而復蘇水漿不入口者三日哀氣傷心遂成疾伏臥牀榻猶泣血不止既葬疾轉甚祀有繼母無他兄弟度不能自起作遺書屬其妻楊氏曰汝善守志以事吾母遂卒楊氏遺腹生一男人以爲天不絕其嗣云泰定三年旌

其門

王庸字伯常雄州歸信人事母李氏以孝聞母有疾庸夜禱北辰叩頭出血母病遂愈及母卒露處墓前旦夕悲號一夕雷雨暴至鄰人持寢蓆往欲蔽之見庸所坐臥地獨不濡濕咸歎異而去又有中部胡士宏扶風楊皞太平胡光遠丹徒孫瑾睢甯吳希曾偃師張恭俱以善居喪聞士宏父有疾傾家資求醫及歿廬墓三年足未嘗至家廬上有奇鵲來巢飛鳥翔集終喪復建祠塋前朔望必往奠祭雖風雨不廢光遠母喪廬墓一夕夢母欲食魚晨起號天將求魚以祭忽見生魚五尾列墓前俱有齧痕鄰里驚異方共聚觀有獺出草中浮水去乃知獺所獻也以狀聞於官表其閭瑾喪父哀毀嚴冬跣足而步停柩四載衣不解帶事繼母尤孝常患癰瑾親吮之又喪目瑾錫之復明母卒十日將葬時春苦雨瑾夜

號天乞霽至旦雲日開朗甫掩壙陰氣復合雨注數日不止希曾
葬父之日大雨希曾跪柩前炷艾然腕火熾雨止縣上狀旌之恭
署鷹房案牘母老辭歸歲凶夫婦采野蔬爲食而營奉甘旨無缺
母病恭手除溷穢喂哺飲食且嘗糞以驗病勢西兵至河南居民
悉竄恭守視母項中一劍不去母驚悸而歿居喪盡哀有馴兔之
瑞又中興尹夢龍母喪負土爲墳結廬居其側手書孝經千餘卷
散鄉人讀之有羣鳥集其冢樹若相拱向者秦州畢也速荅立蔑
里乞氏父喪廬墓晝夜悲號有飛鳥翔集墳土湧起

過宗一海鹽人早喪父獨與母居張士誠略地至海上宗一負母
逃與寇遇欲殺之以身蔽母中數槍賊舍之去旣返益困傭以給
食母卒六年不克葬寢苦服衰蔬食不變語輒泣下白燕巢其室
東西相向及葬燕不復至同郡潘應定有聲士林事親至孝母喪

廬墓有桂花異色白鶴來翔之瑞左丞周伯琦爲書雙禩字揭於
墓

許敬觀明州衛卒也事母至孝一日拉十兵駕舟販鹽至郡江北
渡忽暴風震電霹靂掣舟人上泥塗眾皆震死時敬觀昏絕默念
我死母將誰依若有人援之去死所三丈許而蘇雷火燎髮如脫
人以爲孝行之報

徹徹担古思氏幼喪父事母至孝稍壯母歿慟哭頓絕水漿不入
口者三日旣葬居喪有禮每節序祭祀哭泣常如袒括時年四十
餘猶孺慕每見人父母則嗚咽流涕人問其故曰人皆有父母我
獨無是以泣耳至大三年喪異

邵敬祖宛邱人父喪廬墓母繼歿河決不克葬殯於城西敬祖露
宿其側風雨不去友人哀之爲縛草舍庇之前後居廬六年兩髀

俱成溼疾至治時旌其家其後又有永平李彥忠父喪廬墓八年
不至家茶陵譚景星幼失父追念之廬墓十年亳州郭成年七十
一母喪食粥廬墓一年朝夕哭臨人哀其老而能孝
孔全亳州鹿邑人父成疾刲股愈之後卒居喪盡哀廬墓左負土
爲墳日六十肩風雨有虧俟霽則補之三年起墳廣一畝高三丈
餘張子夔安西人父喪每夜半以背負土肘膝行地匍匐至葬所
飾細土爲墳陳乞兒歸德夏邑人年九歲母喪哀毀親負土爲墳
高一丈廣十六步人憫其幼欲助之則泣拜而辭又有蛾眉趙國
安解州張琛南陽李廷瑞息州耶律伯顏南陽怯烈台皆居喪有
至行廬墓次負土爲墳竝以有司所請表異

何從義延安洛川人祖良祖母李氏偕亡從義廬墓側旦夕哀慕
不脫經帶不食菜果惟啖蔬食而已事父母孝養尤至伯叔祖皆
無子比其亡也從義咸爲治葬築高墳祭奠以禮時人義之

王留孫汝甯汝陽人世以孝行聞鄉里父歿慟至歐血幾絕乃蘇
旣葬結草如繭寢處墓左哀至悲泣苦草爲腐風雪豺虎不避久
之母命再三乃歸服闋猶不食醯醬蔬果至冢木已拱言及其父
母哀如初喪每食稍甘必遣人馳奉墓所歸乃就食

靳曷字克昌絳州曲沃人也兄榮爲奎章閣承制學士奉母王氏
官於朝母歿曷與兄護喪還家至平定大雷雨流水驟至曷伏棺
上榮呼之避水曷不舍去遂爲水所漂沒後得王氏柩於三里外
得曷尸於五里外詔賜孝子靳曷碑

王克己延安中部人父伯通歿克己負土築墳廬於墓側貊高縱
兵暴掠縣民皆逃竄克己獨守墓不去家人呼之避兵克己曰吾
誓守墓三年以報吾親雖死不可棄也遂不去俄而兵至見其身

元書 卷九十三 八
衣衰經形容憔悴曰此孝子也遂不忍害竟終喪而歸趙天爵母喪廬墓三年父繼喪亦如之惟蔬菜羹不飲酒食肉不與妻妾見有司以聞旌表門閭復其家

姜兼建德純安人七歲而孤養母至孝母死哀慕幾絕既葬獨居墓下朝夕哭奠躬自樵爨荒山中一衰麻寒暑不易同里有少年子不善事父母者皆慚悔迎養

趙榮扶風人母有疾割股啖之者三復負母登太白山禱於神得聖水飲之乃痊後年七十五卒榮號痛不食三日方飲水七日乃食粥及葬負土成墳廬其側終喪

高必達建昌人五歲時父明大好道忽棄家遠遊莫知所適必達既長晝夜哀慕乃娶妻以養母而歷往四方求其父十餘年不得見心愈悲每傳黃州全真道院中有虛明子者學道三十年矣本

姓高氏建昌人也必達詢知爲父卽往拜之具言家世及己所生歲月大父母喪葬始末因哀號叩頭不已虛明猶瞑坐不顧久之斥曰我非汝父不去何爲必達留侍左右不少懈辭氣哀惻可矜其徒謂虛明日師有子如此忍弗歸乎虛明不得已乃還家必達孝養篤至鄉里稱之

劉琦岳州臨湘人生二歲而母劉氏遭亂陷於兵琦獨事其父稍長思其母不至輒泣下及冠請於父往求其母徧歷河淮閒數歲不得後求得於貴池迎以歸養後十五年而父歿又三年而母歿終喪猶蔬食詔表其門曰孝義又有漁陽曾德曾子五十七代孫母早亡父仲祥游襄陽樂其土俗繼娶左氏因家焉亂兵陷襄陽遂相失德徧往南土求之五年乃得繼母於廣海閒奉迎以歸有司以聞詔旌復其家

羊仁廬州廬江人也阿朮兵南下仁家爲所掠父被殺母及兄弟皆散去仁年七歲賣爲人奴力作二十餘年其主憐之縱爲良仁蹤迹得母於潁州兄於睢州弟於邯鄲皆爲役尙無恙乃徧懇親故貸得鈔百錠歷詣諸家求贖之經營百計更六年大小二十餘口復聚居爲良孝友甚篤鄉里美之大德十二年旌其家又有黃覺經建昌人五歲因亂失母稍長誓天誦佛書願求母所在乃渡江涉淮行乞而往備歷艱辛至汝州梁縣春店得其母以歸章鄉蜀人本劉氏幼爲章提刑養子與母富氏相失三十八年徧訪於江西諸郡迎歸養之俞全杭州人幼被掠賣爲劉饒家奴後獲爲良自汴歸杭尋其母及姊得之事母以孝聞李鵬飛池州人生母姚氏爲嫡母不容改嫁爲朱氏妻鵬飛初不知也年十九思慕哀痛誓學醫以濟人願早見母行求三歲至蘄州羅田縣得焉時朱

氏家方疫鵬飛起之遂迎還奉養久之復歸朱氏時渡江省覲旣卒歲時攜子孫祭奠終其身並以有司請旌其閭

祖灝然字養吾建甯人也盜黃華起政和官軍往討回軍經浦城掠其母全氏而北時灝然方六歲獨與父居者二十八年後長三山書院或告以母在河南而不能名其處灝然棄職辭父抵河南每舍逆旅行途聞操南音者必就於語久之知全氏已輾轉歸汝鄧聞灝然遂回汝州徧訪之或有言在別蓋山者益喜怵走三百餘里其母果在奉以歸聞者莫不歌詩美之往往舉朱壽昌事爲比

陳斗龍字南仲杭州昌化人也父澤民以學行聞當事招致弗就築室百丈谿上講所學時宋亡郡縣內附而盜起婺源澤民挈妻子廬深險處避亂一歲病卒斗龍年十三居喪廬墓哀感行路有

羣雁集其上飛鳴三日夜不去長已娶妻推長宗晦書院其婦翁告之曰汝非嫡出也汝母王氏產汝未一歲遺歸錢唐聞其家在清湖中斗龍驚哭卽日與妻訣具裝行曰此去不得母者誓不歸也及至清湖訪求母家及其故時比鄰皆經亂離無存矣徐逢白髮媪問焉曰而母歸無幾時卽往江東亦未知爲何州也斗龍卽入江東往來數郡間一夕舍永豐禮賢鎮逆旅主人怪其數過問客何爲者告之故其人驚曰吾主人施氏小婦王自言家清湖今老矣豈汝母耶因走告良久出詢斗龍父時門巷兒名歲甫去老婦人哭出斗龍哭前拜遂求於施氏奉母歸會徽州復亂盜逸出昌化境斗龍爲廬百丈山身自負母妻擁後未至路逢盜數百人斗龍置母夷處稽首曰壯士余幼失母行求六年得母歸未百日若夫婦死誰當養母者盜咨嗟釋去且約其徒勿更至此里人頗

賴以免後斗龍蒔甘瓜圃中秋暮母病渴甚思食瓜而非瓜時斗龍視空蔓芘芘然披之異根合莖竝蒂兩實者二摘以奉母卽日渴已病平明日圃之天羅瓜亦如之遂於百丈溪上作百丈書院祠朱李葉三君子侑以澤民延師教里子弟又以百丈源山地五百畝爲義山以掩鄰之不能葬者達魯花赤阿兒思蘭請於朝旌其家

胡景清龍溪人國兵下漳南景清甫五歲隨父母逃難倉卒失母及長知學每念母輒涕下不食乃辭父尋母抵幽薊燕市遇其叔胡巨川知母已至燕而未識其處踰年始得之事聞詔旌之仍給驛以歸同邑顏應祐母許氏先以患難遷徙失所之母子不相聞者二十六年應祐訪求不得常悲號流涕一日得書知在滇南卽往求之果得母於蜻蛉嶺迎以歸士君子咸歌詩以嘉其孝周古

象蘄水人元初被兵掠至蘄賚蒙古氏既生子未嘗喜笑妻詢其故曰有母在欲得歸省耳妻許之且曰母在當奉養母以妾故復來及歸母尙無恙古象奉母盡孝母歿廬墓妻亦終身不嫁淮西僉憲韓克莊爲立孝里門

黃贊字止敬臨江人父君道延祐間求官京師時贊尙幼及長聞父娶後妻居永平往省之則歿已三年矣父後妻聞贊來盡挾其貲更嫁拒不見贊贊號哭語人曰吾來爲省父今不幸父歿思歸其柩但求示以葬所死不恨尙忍利財物耶久之聞後母居海濱亟裹糧往復拒不納其弟憐之與偕至永平求父墓弗得贊哭禱於神夜夢老父以杖指葬處曰見片磚卽可得明日卽其地求之父後妻弟驚曰此良是斂時有某物可驗卽起朽棺負其父骨以歸又趙應祥廬陵人年十四其父從賈不還從父從北來知父已

死卽辭母往求聞都下有曾老者與父善走數千里詢之知父殯濱州墓纍纍不可辨應祥行哭七日解髮繫馬鞍祝曰隨馬所之過吾父墳者當髮解鞍墜旣經一墳果如所祝卽發之棺上具其父姓名遂脫己衣裹父骨負之以歸史彥斌邳州人早歲嗜學有至性至正閒河溢墳墓多壞彥斌母卒乃爲厚棺刻銘其上仍釘以四鐵環然後葬明年墓果爲水所漂彥斌縛草爲人置水中仰天泣曰母棺被水不知其處願天矜憐假此芻靈指示卽乘舟隨草人所之行十餘日草人止桑林中視之母柩在焉載以歸復葬廖人俊甯都人也七歲時父死亂兵母亦被掠去獨與祖母居處旣長誓求父骨得於叢冢閒又聞母在滄州往尋之至則母已死欲奉骨歸葬異父弟不肯遂刻遺像而還與父合葬焉又邱敬建甯人幼孤母爲賊掠去敬求不得刻木肖像晨夕侍奉一夕妻饋

奠誤觸像仆地敬哭泣擗踊幾絕卜葬交溪上服喪三年歲時祭享人稱其鄉曰孝鄉

田喜清苑人太祖時國兵破金保州盡驅居民下令老者殺喜聞命欲代父死遂潛往伏其父於下以兩手據地俛而延頸以待之卒舉刃未暇省閱喜中兩刀死夜半復蘇後旬日令再下無老幼盡殺時喜創已愈以藝被選行次安肅聞其父死逃歸求父尸得之負以涉河水傷脛至血出發母冢下尸而塞之乃還眾不之覺元好問郝經皆爲詩文美之又東平繆倫字叔彝當淮兵亂執其父將殺之倫哀號乞免不聽願盡傾家貲贖父命又弗聽乃自縛請代賊殺之而釋其父

郭狗狗平陽翼城人父甯爲欽察先鋒使首領官成大良平宋將史太尉來攻夜陷之甯全家被俘史將殺甯狗狗前請曰勿殺我父請殺我史驚問曰是兒幾歲耶甯曰五歲史曰五歲兒能爲是言吾當全汝家卽以騎送甯等往合州道遇國兵甯家俱得還御史以事聞命旌之

樊淵建康句容人幼失父事母篤孝至元十二年奉母避兵茅山兵至淵抱母號哭以身代死兵兩釋之三十年江東廉訪司辟爲吏母亡奔喪哀感行路服闋奉神主事之起居飲食十年如生平省臺交薦淵不忍去墳墓終不起延祐閒甯化人賴祿孫母病值蔡五九作亂負母從邑人避南山盜至眾散走祿孫守母不去以身翼蔽請代母渴不得水祿孫含唾煦之盜相顧駭歎反取水與之有欲掠其妻去者眾責之曰奈何辱孝子婦遂歸之竝賜褒表王閏東平須城人也父素饒賈老罄其貲不能甘淡薄性復乖戾閏朝夕勤苦奉甘旨左右承順甚得歡心鄉里稱焉父嘗臥疾夜

然長明燈延燒室中聞聲驚走煙燄已蔽寢戶閨突入火中解
 衣裳父抱而出肌體灼爛而父無少損一女不能救遂焚死中統
 二年復其役又劉源中牟人母年七十餘衰病不能行適火起且
 延至其家源呼天號泣趨入抱母為火焚而死祝公榮麗水人母
 歿居喪會失火公榮不能救乃伏棺悲哭其火自滅復塑二親像
 於堂朝夕事之如生

郭道卿興化莆田人也四世祖義重至孝宋紹興間有詔旌表鄉
 里為立孝子祠至元間閩盜起居人竄匿道卿與弟佐卿獨守孝
 子祠不忍去遂俱被執兄弟爭代死引頸請刃盜相顧曰孝門兄
 弟固不同於人也兩釋之道卿年八十子廷焯為建甯路平準行
 用庫使辭歸侍養道卿嘗病疝危甚廷焯憂瘁扶護一夕髮盡白
 有司言狀旌之

朱元字子初婺州義烏人也父環宋末進士以篤孝稱至元中盜
 起縉雲置砦與元家近盜將劫其父環及兄遇魁謀為帥元策賊
 若縛父去則必蒙從賊名念不如殺賊自明以解其難因殺偵騎
 二人梟首市中而負父北逃父遂得免元有妹曰壽歸金華胡象
 祖楊鎮龍之反環有亡奴嘗怨環搗傷已欲連環出貲助鎮龍時
 宣慰使史弼怒賊甚凡所引必盡殺乃止元疾不能起視壽泣壽
 曰昔緹縈能救父我獨非人耶乃以其情泣告法曹掾馮耿賢哀
 祈甚至賢惻然許諾明日使吏椎碎奴口不果誑

張紹祖字子讓潁州人讀書力行以孝行聞於朝特授河南路儒
 學教授至正時奉父避亂山中賊至執其父將殺紹祖泣曰吾父
 耆德善人不當害請殺我以代父且若等獨非父母生乎何忍害
 人父也賊怒以戈擊之戈應手鈍挫賊感相謂曰此真孝子不可

害乃釋之又有瑞州李明德紹興石永壽者皆讀書有志行至正十四年兵亂以身代父死又有膠州張緝字士明能詩文至正七年與兄紳弟經同領鄉薦由澤州儒學正轉泰州幕職棄歸養親十五年揚州亂緝母姬氏方臥病賊突入臥內舉槍欲刺緝以身蔽之槍中緝脇三日而死

劉思敬延安宜君人也父年八十兩目俱喪值亂兵剽掠負父避巖穴中兵至欲殺之思敬曰父老矣又無目我死不足惜使我父何依乎兵憐其孝父子俱免於難又有晉安呂祐字伯通郡城破有卒入其室拔白刃脇其母林氏索財寶不得揮刃所之祐急以身蔽母奪其刃手指盡裂被傷仆地良久而蘇開目視曰母幸無恙我死無憾矣遂瞑目死温州周樂宋狀元坦之後也父日成通經能文海賊據温州拘日成海舟上樂隨往侍其父不離左右一

日賊沈日成於水樂泣請曰我有祖母幸留父侍養請以己代父死不聽樂抱父不舍遂同溺死越數日兩尸並浮而上賊以篙抵之卒不解

孫抑字希武晉甯洪洞人也以進士歷任至刑部郎中關保之變挈父母妻子避兵平陽柏村有亂兵至村剽掠拔白刃嚇抑母求財不得舉刀欲斫之抑急以身蔽母請代受刃母乃得釋而抑父被虜去或語之曰若父被驅而東矣聞得所掠民皆殺之汝慎無往就死也抑曰吾可畏死而棄父乎遂往出入死地屢瀕危殆卒得其父以歸

王初應漳州長泰人也至大四年二月從父樵劉嶺山有虎出叢棘中搏其父傷右肩初應赴救抽鎌刀刺虎鼻殺之父得生泰定時同縣施合德父嘗出耘爲虎扼於田合德與從弟發仔持斧前

殺虎全父竝旌其門又石明三者與母居餘姚山中一日明三自外歸覓母不見見壁穿而臥內有三虎子知母爲虎害也乃盡殺虎子礪巨斧立壁側伺母虎至斫其腦裂而死復往倚巖石旁伺牡虎亦殺之明三亦立死不仆張目如生所執斧牢不可解徐鈺鎮江人侍父之婺源過丹陽小溪父墮橋下同行者不能救鈺投溪擁父出而力已憊遂溺死行省以狀請表又有夏永慶字章甫定海人侍父文德轉粟京師舟抵海洋鎮盤載喧呼文德顛仆溺水永慶震駭沒入洪濤載父出波面柁工提戟鉤其衣父賴不死永慶力不支竟沈於海其後諸弟傷之居同室食同爨至正十三年表曰孝義之門

葉雋字良弼松溪人讀書通大義祖母年高病足雋與姊妙儒昇而起臥者五年痛父死於賊傾家募壯丁從間道入賊境殺其渠魁載父屍還事聞授南豐知州辭不拜廬於墓側旦夕悲泣芝生隧道自號湛盧樵者

陳韶孫番禺人也父瀏以罪流肇州韶孫年十歲不忍離朝夕號泣願從父不能奪遂與俱往跋涉萬里過遼陽平章塔出憫之曰朝廷寬仁罰不及嗣邊地苦寒非汝所堪吾返汝故鄉願乎韶孫曰旣不能以身代父當死生以之歸非所願塔出驚異賞以錢已而瀏死韶孫哀慟見者泣下肇州萬戶府以聞命送還鄉里仍旌異之

孔洙聖裔也自宋南渡孔子四十八代孫端友從南家衢州襲封衍聖公金人亦求其在曲阜者封焉世祖旣平宋議所立或曰寓衢者爲大宗召洙至欲封之使歸魯洙以先世廟墓在衢因讓爵於在魯者且以母老乞南還世祖嘉之曰甯違榮而不違親眞聖

人後也投祭酒兼提舉浙東學校以便養母自端友後六世皆襲衍聖公其罷封自洙始

長壽父帖住官平章政事生五子長山壽早世次卽長壽次永壽福壽芒古海身元統間帖住歿長壽哀毀盡禮服闋當蔭敘與弟同拜母前曰吾父廉貧諸弟未有所立願以職讓永壽永壽讓福壽福壽曰二兄能讓福壽何獨不然以讓季弟芒古海身母從之芒古海身遂告蔭爲太禧宗禋神御殿侍禮佐郎兄弟奉母尤篤邦閭美之至大閒河中梁外僧親喪廬墓兄那海爲奧魯官自以嘗遠仕不得養其親卽棄職舉外僧代之人謂外僧能孝那海能義又有畏吾氏秋秋及濠州高中嘉定武進皆以侍親不願仕以祖父蔭讓叔父昆弟云

楊一懷孟人至元閒憐其叔貧遂焚分契同居三十年無閒言張

本在平人篤孝事伯叔父皆甚謹伯父嘗病本晝夜不去側復載以巾車步挽詣岱嶽禱之張慶眞定人善事繼母伯父泰貧居河南迎歸養之比於所生元善大名人父有昆弟五流散江淮久之遂客死至大四年善往尋其骸骨竝迎弟姪等十五喪而歸改葬祖父母以諸喪序列附於塋次州縣以聞竝旌其家

郭全遼陽人幼喪母哀戚如成人及壯父庭玉又卒居廬三載啜粥面墨繼母生四子皆幼全躬耕以養旣長聚婦各求分財異居全不能止凡田廬器物悉自取朽敝者奉繼母以居甘旨無乏繼母卒全年六十餘哀毀痛瘠廬墓終喪又有劉德奉元人父娶後妻德事之如所生家貧傭工取直寸錢尺帛皆上之年五十未娶稱貸得錢先爲異母弟求婦諸弟亦化其德一門藹然鄉里稱爲劉佛子其善事繼母者復有馬押忽及大都人劉居敬竝蒙降旨

褒美

吳好直華州蒲城人也父歿事繼母孝兄弟嘗求分財好直勸諭不能止卽以己所當得悉推與之出從師學澹泊三十年無少悔又有甄城柴郁陳舜咨皆能孝友讓產兄弟蒙表

劉德泉汴梁杞人也早喪母父榮再娶王氏生二子居敬居元而王氏病卒德泉撫幼弟甚至至元末歲饑父欲使析居德泉泣止不能得乃各受其業以去久之父卒復同居至治三年眞定朱顯自祖父已分財至顯念姪幼無恃謂弟耀曰同氣可異處乎乃會拜祖墓下焚分券復同居延祐間蔚州吳思達兄弟六人嘗以父命析居思達爲開平縣主簿父卒還家時兄弟多破產思達治葬畢會宗族泣告其母曰吾兄弟一母生忍使苦樂不均邪卽以家財代償其逋更復其居母卒哀毀甚宅後有柳連理人以爲孝友

所感又有朱汝諧者濮州人父子明嘗命與兄別產父卒兄產盡廢汝諧泣請其居仲父貧病迎至家奉湯藥甘旨甚謹後卒喪葬盡禮州縣各以名聞表其閭

劉廷讓大甯武平人也至順初北方兵起廷讓挈家避山中有幼弟方乳母王氏置於懷事急廷讓乃棄己子一手抱幼弟一手扶母疾行得免事聞旌之

扈鐸汴梁蘭陽人也早孤育於伯父及壯事伯父如所生伯父老無子鐸爲買妾歲餘產一女其妾性頗不慧熟寐壓女死久之伯父卒鐸喪之甚哀遺腹生一男鐸懲前失告其母及妻妹護視之己復廬戶外中夜審察不敢安寢弟能食常自抱哺與同臥起十年不少怠弟有疾鐸夜稽顙星斗哀禱曰天不伐余家鐸父子間可去一人勿喪吾弟使伯父無後也明旦弟愈母卒廬墓側不理

家事宗族勸之歸鐸曰今歲凶多盜吾家雖貧安知墓中無可欲乎倘驚吾親之靈雖生何爲卒守廬不去

杜友開字陽父江陰人也隱居教授妻吳辟纊以資之天祿閒浙右災荒米價騰踊學徒散去友開不忍餓困吳之兄弟屢勸斬邱木鬻基地以少延餘息友開堅持不可卽欲挈吳歸吳曰夫旣盡孝妾獨以不義自處甯不食若粟遂相枕藉而卒

唐轅唐轂慶元唐復禮子也復禮以擅匿官鹺事當執拘以歸於京轅詣吏代父北行不省乃叩頭流血繼之以死吏憫其情遂脫父桎而桎之行至越轂適回自杭遇諸道上卽挽轅衣袂頓足哭曰兄爲冢子宗嗣所託不可以徒死弟請代兄行轅不從轂給之曰兄訥於言說往對廷尉必不免弟有一策可生幸無苦竟奪其桎加已手吏亦憐而從之轂抵京繫獄者旬日近臣乃奏其非罪

例免以歸得不死同時戴良爲傳謂可與國風衛宣二子爭烈云袁清吉廣州人少有至性有甥黎某素不逞過門不下馬其兄祥吉遇之責曰爾母見在吾家何倨而無禮黎憾之適土寇王城構亂黎倡言曰里人無不服將軍者獨袁祥吉不服不殺之無以號眾城信之執祥吉將加刑清吉詣營哀告曰願以身代死留兄養母撫幼姪城竟殺清吉以示眾

陳謙字子平平江人也性至孝家貧隱居教授資弟子束修以養及父母卒居處葬祭悉遵禮制哀毀骨立疏食水飲以終其喪初父病痒思鱖因市以進而父已歿遂終身不食鱖兄訓嘗爲鹽運司吏及考滿歸甚貧謙養之如嚴父未幾訓復宦游於外而謙獨留有友孫子翼者家京口家貧有女及笄不能嫁謙常許以資助及聞子翼病篤瞿然曰吾與子翼約其可食言乎卽持資往京口

訪子翼爲畢家事謙多著述虞集黃潛張翥嘗欲論薦謙不屑也至正十六年訓以江浙行省照磨謁告還吳適外兵薄城甚急俄聞城陷訓卽與謙訣曰吾雖位卑嘗爲王臣義不可辱弟處土耳宜卽避兵謙不從賊入訓不屈遂刃其胸謙翼蔽之乞以身代眾以謙儒冠掖之出謙復入伏屍號慟因竝見害悉投於河惟一子十餘歲得免明日門弟子得其屍於篠橋下兄弟猶相倚立水中若抱持然官爲給粟助之斂葬著述具藝文志

鄭德珪婺州浦江人也弟德璋家世以孝友聞至元中仇家傾德璋以死罪德珪竟以計先死之以救德璋德珪生文嗣其家十世同居凡二百四十餘年一錢尺帛無敢私至大間表其門文嗣沒德璋子大和繼主家事益嚴而有恩家庭中凜如公府子弟稍有過頽白者猶鞭之每遇歲時大和坐堂上羣從子皆盛衣冠雁行

立左序下以次進拜跪奉觴上壽畢自右趨出足武相銜無敢參差者見者嗟慕謂有三代遺風狀聞復其家部使者余闕爲書江東第一家以褒之皇太子聞其事歎曰此國家祥瑞復親書鳳麟二大字賜其家

趙毓唐江人父福遷管城其先三世同爨毓官福州司獄滿歸以母老不復仕一日會諸弟泣申遺訓願世世無異處且祝天歎血以盟自是大小百口略無閒言同力合作家道以殷毓長兄瑞早世嫂劉氏守志毓率家人虔事之次兄選繼沒嫂王氏年少毓妹贅王祐亦少寡皆守節事姑人謂孝友節義萃毓一家元貞初旌之

張閏延安人隸軍籍八世不異爨家人百餘口無閒言日使諸女婦娶一室爲女工工畢斂貯一庫室無私藏閏兄顯卒卽以家事

元書 卷九十三
付兄子聚聚曰叔父行也宜主之閏曰汝宗子也宜主之相讓既久卒以付聚摺紳之家自謂不如至元二十八年旌表其門又有蕪湖芮世通十世同居峽州向存義汴梁丁煦八世同居竝加旌美

魏敬益字士友雄州容城人也性至孝居母喪哀毀骨立素好施與有男女失時者出資財爲之嫁娶歲凶爲糜以食饑者田僅十六頃一日語其子曰自吾買四莊村之田十頃環其村之民皆不能自給吾深憫焉今將以田歸其人汝謹守餘田可無餒也乃呼其村人而歸其田眾皆愕眙不敢應強與之乃受而言諸有司有司以聞丞相太平歎曰世乃有斯人哉

訾汝道德州齊河人也以孝聞母高氏治家嚴汝道承順甚恭母嘗寢疾晝夜不去側一日母屏人授以金珠曰汝素孝室無私蓄今以此畀汝毋令他兄弟知也汝道泣拜辭之母卒哀毀終喪不御酒肉二弟將析居悉以美田廬讓之二弟早世撫遺孤如己子鄉人劉顯等貧無以爲生汝道割己田各畀之使食其租終身里中嘗大疫有食瓜得汗而愈者汝道卽多市瓜及攜米厯戶饋之或謂癘氣能染人益周行問所苦亦卒無恙嘗出粟麥貸人至秋而蝗人無以償卽焚其券縣尹李讓請旌其家

孫秀實大甯人性剛毅喜周人急里人王仲和嘗託秀實貸富人鈔二千錠貧不能償棄其親逃去數年其親思之疾秀實日饋薪米存問終不樂秀實哀之悉爲代償取券還其親復訪仲和使歸父子歡娶聞者莫不歎美又有賈進大同人大德閒地震民居多傷且乏食進給酒藥炭米濟之每歲冬製木棉衣數百襲衣寒者買地爲義阡使無墓者葬之李子敬三原人嫁不能嫁者五十餘

人葬不能葬者五十餘喪焚通券四萬餘貫竝旌之

黃國華字叔文處州麗水人也性方嚴終日衣冠危坐而施舍無倦宗族賴焉歲歉必賤直糶粟以活民或大雪有不舉火者輒遺之里中爭者多從直其辭惡少盟里橋圖爲變國華適過之眾驚散曰長者得無聞之乎國華知之乃召與飲諭以禍福因出金帛於庭曰汝以貧爲不義以此助汝眾慙弗敢取而去乃追與之所居之地曰弱溪國兵南出大家右族皆避難溪上重貨山積及聞兵猝至委之而走國華爲收貯之事定召其主悉歸無遺焉

瞿嗣興字華卿常熟人父達仕怯憐口提領母患癰潰當長夏穢不可近嗣興燂湯洗滌執扇驅蚊蚋靡晝夜至月餘乃休旣而又罹逆氣衝擊上下百藥不治或授以割股法祝刀於天俟刀躍方可用嗣興頓顙流血刀弗動嗣興情迫強取刀割股作羹以進母

不食已五日忽啖之氣銷如矢下一日母思芟時始華求諸市不獲解衣入水厯覆其葉覓之雙脰皆赤腫俄得三芟於水中人以爲精誠所感居恆遇單窶者必量給而不使其知甌工王氏家無甌石儲且臥疾不能興雞初鳴嗣興往其門以錢二十緡投窻隙而去民有告糴者錢五千嗣興陽曰吾性多忘汝十千邪遂如數與之負販夫或來買遷嗣興輒如其言予之直曰彼竭汗血以逐什一之利乃欲足吾欲乎歲大饑來相依者數十人嗣興舍之近舍會癘氣作病者相枕藉嗣興每晨躬攜粥藥撫視皆賴以全有亡契及白金者密偵其人還之其人勢家奴因失主物思欲死謝曰三尺微命孝子所賜也州里翕稱之

顧德玉字潤之嘉興人幼從新昌俞觀光學觀光無子嘗語人曰吾昔寢疾於杭德玉侍湯藥情至切醫爲感動弗忍受金今我且

老必託之以死既而訪醫吳中病且革趣舟歸德玉進至尹山卒
明日乃至嘉興德玉奉其尸斂於家衰經就位哭卽葬於海鹽近
顧氏先塋歲時祭享或曰斂於家禮歟曰禮云師哭諸寢生服其
訓死而委諸草莽有人心者弗爲也聞者歎服

王一山杭州人居吳山第一樓屬邑有一巨室與之友後以罪逃
匿憲使怒揭示通衢匿者罪連坐首者賞萬緡一山隱友於密室
期月不發鄰家察知利其賞告於官竝逮一山憲使詰之曰汝見
示奚不就利而就害一山曰友朋顛連來奔乘危以售則名教所
不容某誠弗忍連坐甘心使異而釋之

沈右字仲說平江人四十無子妻鄒氏候其他適爲置美妾及歸
命出拜詢其鄉貫再三乃泣曰妾范復初女也父喪家貧老母見
鬻於此右惻然因屬妻曰此吳中名士女吾故人之息豈可爲妾
邪卽訪其母擇壻備奩具嫁之

顧中庸泰州人以財雄一鄉素好義有古俠士風與保定張文友
交文友爲縣尹秩滿僑居江陰暴卒時中庸留京師友人以訃告
中庸戒勿泄友問其故曰文友賢而貧在六品選人中吾將與其
子爲地卽入狀中書言文友病願致仕旣領宣命又代文友子告
瘡尋注常州晉陵尉就近養母其家悉無所知中庸南歸乃遣人
奉宣敕以授其子聞者驚歎

葉公政字克明淮陰人以浙西幕史奉檄轉餉鄂閩時丹陽富人
東子章先與是役會飲於蘄志相合卽以兄事公政未幾子章起
赴沔泣別曰弟今濟大江涉重地兄言行篤信願以貲囊相託公
政謹藏之越兩月其友朱君讓來謁曰子章不幸入蓮臺湖遇盜
死昔寄囊中有我物敢請之公政不與君讓疑其匿也銜之明年

公政還至丹陽會束朱二氏啟囊得珠八千枚黃金銀鈔衣帛歸之束氏又珠千枚金銀及鈔有朱題封歸之朱氏公政凡爲平章政事卜顏帖木兒司輜糧四年無纖介譴論薦不報人皆惜之趙一德字季潤新建人初其家被俘至燕事鄭萬戶鼎家歷三世號忠幹一日泣請於其主鄭阿兒思蘭及其母澤國夫人曰一德自去父母依門下三十餘年故鄉萬里不獲歸今父母已老脫不幸則永爲天地罪人鄭母子皆感動許之歸期一歲而返比至父兄已沒惟母在年八十餘一德卜地葬二柩畢欲少留事母思得罪如期還燕鄭母子歎其孝卽縱之將辭歸會阿兒思蘭爲脫虎脫誣死詔簿錄其家眾各亡散一德獨奮然留不去已而脫虎脫敗一德詣中書訴枉狀得還所籍鄭母勞之曰當吏籍吾家時親戚不相顧汝獨冒險留此復力白吾枉疾風知勁草也卽分美田

廬遺之謝曰一德雖鄙人未有利於是也重哀吾主無罪而受戮故以相報今母已老憊得歸侍養主賜厚矣遂不受而去劉信甫揚州人曹氏奴也曹瀕死以孤託之孤漸長其叔利孤財妄訴於府言其家實未分析而產爲姪據總管察其詐斥之叔之子以父訟不勝慚且憤乃毒父死而復訴於府言弟殺吾父適達魯花赤馬馬火者初至與總管有隙欲因此獄竝中總管遂引致百餘人皆抑使誣服以爲姪實殺叔而總管受賕寬之也及末鞠信甫曰殺人者其子也姪實不知守亦無賄遂被鍛鍊身無完膚終無異辭初信甫先遣人密送孤過京師避於一達官家屬之曰慎勿出至是乃厚賂達魯花赤孤得無預而信甫減死旣而叩蹕陳告達魯花赤以罪罷總管復涖官凡訟獄道里費蓋以鉅萬計孤歸欲償之信甫曰奴之富皆主翁之蔭也脫主於難分內事耳

豈計利哉竟力辭不受

論曰孝者庸行而至德要道莫有以加也秦人家富子壯則出分家貧子壯則出贅故借父耰鋤亦有德色父子爭利以貧富為雄雌傷哉其言之也况乎交道以義合者哉或者謂交游則必信薄其所厚而厚其所薄未之有也吾於夷子之厚葬而知人之有至性也施由親始是親親仁民之道也雖異端焉足以易之哉如此則可利溥天下而以義名矣

申灼根 刊

劉世昌 刊

門人曾毓才襄校

門人曾士琮詳校

元書卷九十三

元書卷九十四

邵陽曾廉撰

列女列傳第六十九

白虎通義曰妻者何謂妻者齊也與夫齊體自天子下至庶人其義一也禮郊特牲言壹與之齊終身不改夫有天地然後有萬物有萬物然後有男女有男女然後有夫婦有夫婦然後有父子有父子然後有君臣有君臣然後有上下有上下然後禮義有所錯乾則男道也坤則女道也天尊地卑乾坤定矣其謂之齊何也昏禮冕而親迎親之也與敬為親弗愛不親弗敬不正既至共牢而食此所以明齊之義也乃余聞之禮曰男女嫁娶皆不自專必由父母須媒妁遠恥防淫泆也婦人從人者也幼從父兄嫁從夫夫死從子故其始也詩曰乃生男子載寢之牀載衣之裳載弄之璋

其泣嗶嗶朱芾斯皇室家君王乃生女子載寢之地載衣之裼載弄之瓦無非無儀惟酒食是議無父母貽懼古之天子而生男女異禮如此非故爲軒輊也女子十年不出姆教婉婉聽從執麻枲治絲繭織紝組紃學女事以共衣服觀於祭祀納酒漿邊豆菹醢禮相助奠先嫁三月教以婦德婦言婦容婦功教成祭之牲用魚芼之以蘋藻所以成婦順也順於舅姑和於家人而後當於夫以成絲麻布帛之事以審守委積蓋藏婦順備而後內和理內和理而後家可長久也故婦必有姆傳教之以成婦也宋伯姬待姆不至遂火而死春秋高之此婦人之道也故曰無攸遂在中饋貞吉閑有家悔亡家不可不閑也何則飲食男女人之大欲存焉男女授受不親御婦人則進左手姑姊妹女子子已嫁而反男子不與同席而坐寡婦不夜哭婦人疾問之不問其疾以此防民民猶淫

泆而亂於族禮非祭男女不受爵以此防民陽侯猶殺繆侯而竊其夫人人生而靜天之性也感於物而動性之欲也物至知知然後好惡形焉好惡無節於內知誘於外不能反躬天理滅矣夫物之感人無窮而人之好惡無節則是物至而人化物也人化物也者滅天理而窮人欲者也於是乎有悖逆詐僞之心有淫泆作亂之事是故强者脅弱眾者暴寡知者詐愚勇者苦怯疾病不養老幼孤獨不得其所此大亂之道也聖人懼焉故禮始於謹夫婦爲宮室辨內外男子居外女子居內深宮閉門闔寺守之男不入女不出言有閑也自漢以來班昭作女戒爲深明男女之義而史載有女子化丈夫之事謂之人痾陰陽內外天尊地卑未可紊也邪說僨興以齊藉口而欲棄父兄去師傅廢媒妁違夫子男女淆則無夫婦無夫婦則無父子無父子則無君臣無君臣則無上下無

上下則爪剛者決力強者奪而人類亦漸滅以盡矣豈不哀哉然後知乾坤之道以地配天而地非尊以女配男而女實卑齊者親迎共牢之禮非婦人理陽事修男教以爲齊也如是則天下悉人痾也女教蕩然棄幃毀裳宣淫行路妾婦乘其夫臣子背君父小人陵君子夷狄侵中夏由此其造也四逆興而天地閉故曰不明晦初登於天後入於地言明夷也故男女之別國之大節也氓之蚩蚩猶以榛狁爲清風野放爲美化欲胥天下而從之是先於亂男女之別而後三綱可得而靡也此狂徒圖所以亡中國之計也豈足信哉元時國俗父死妻後母兄死妻寡嫂駙馬多有繼尙之主匈奴之穢未滌也然自皇族以至窮巷求其賢者監國公主威振貔虎而有螽斯之遺徽文公主不從舊俗以嫠終身皆卓然爲世坊表况乃孝懿之行貞白之操斐亶之文壯烈之氣史不絕書

乎余錄百六十餘人以爲列女傳以明男女異軌婦人圭臬焉葛妙真宣城民家女九歲聞日者言母年五十當死妙真卽悲憂祝天誓不嫁齋素以延母年母至八十一乃卒又畏吾氏三女者家錢塘諸兄遠仕不歸母思之成疾三女欲慰母意乃共斷髮誓天終身不嫁以養母同力護侍四十餘年母竟以壽終事上並賜旌異

秦氏二女河南宜陽人逸其名父嘗有危疾醫云不可攻姊閉戶默禱鑿己腦和藥進飲遂愈父後復病欲絕妹復割股肉置粥中父小啜卽甦孫氏女河間人父病癩十年女禱於天求以身代且吮其膿血旬日而愈許氏女安豐人父疾割股啖之乃痊張氏母嫁廬州爲高屋妻目疾喪明張氏歸省抱母泣以舌舐之母復能視州縣各以狀聞皆旌之

袁氏孤女建康溧水州人年十五母嚴氏孀居極貧疾癱疾卧牀者數年女事母至孝至正十二年兵火延其里鄰婦強攜之出避火女泣曰我何忍舍母去遂入室抱母共焚死

葛孝女金溪人元末江南官吏有鑿山坡河取金以充貢者不足則轉市他所必取盈而後已民多鬻產以償官爲害無既孝女因有司榜掠其父徵求銀治遂投冶中死刺史奏止其貢邑人賴而祠之蘇天爵危素皆題贊之以警獻利者

馬英河內人父兄繼沒英獨事母甚謹又奉二寡嫂與居及母歿四喪並葬親負土爲四墳手植松柏廬墓側終身

趙玉兒冠州人嘗許爲李氏婦未婚夫死誓不嫁以養父母父母沒負土爲墳鄉人稱其節孝

胡秦海鹽人匠氏女也母沈氏患手足攣積年不愈家人侍疾者

或厭倦秦旦夕侍奉盥櫛溲矢卧起必親抱扶之兄後娶妻嫂難於事姑乃謀析居而秦遂留母家以養母至順閒歲荐饑秦夜作傭織紵給食至剪髮鬻之以贍不足秦傷母病無瘳時乃剔股餌母不效後又聞郡人戴某親有疾刃胸療得差一日俟家人出卽刃割胸取肉雜他肉以進因病創沈氏年且七十病如故秦侍疾三十餘年益加謹不衰初秦少時許字里人宋氏子疾弗良弗可託終身或謂秦宜及未婚別圖配偶無貽後悔秦不從卒嫁之事夫甚得婦道夫亦順而化其義與秦俱居外家眠外姑如母焉

李智真建甯浦城人父子明無子智真七歲能讀書九歲母病調護甚謹及卒哀慟欲絕不茹葷三年治女工供祭祀及奉父甘旨不乏鄉里稱爲孝女父嘗許爲鄭全妻未嫁從父客邵武郡豪陳良悅其慧強納采求聘智真斷髮拒之且數自求死良不能奪卒

歸全事舅姑以孝稱泰定閒全病歿智真悲泣不食數日而死
王安哥偃師王氏女也天麻初從父避兵邙山丁家洞兵入搜得
之見其色美驅使出欲污之不從投澗死

李順兒許州儒士李讓女也性聰慧頗涉經傳年十八賊陷鈞州
密邇許昌父謂其母曰吾家以詩書相傳此女必累我女聞之泣
曰父母可自逃難勿以女爲憂須臾於後園自經死

劉氏二女長曰貞年十九次曰孫年十七南昌人皆未許嫁陳友
諒兵寇江西其母泣謂二女曰城或破置汝何處二女曰甯死不
辱比城陷二女登樓自經婢鄭奴亦縊死

韓氏女保甯人年十七遭兵亂慮爲所掠乃僞爲男服混處民間
旣而果被獲居軍伍中七年人莫知其女也後從攻雲南還遇其
叔父贖歸成都適尹氏猶然處子人皆異之稱爲韓貞女

陳淑貞富州陳壁女也壁故儒者淑貞七歲能誦詩鼓琴至正十
八年陳友諒寇龍興淑貞見鄰媪倉皇來告乃取琴坐牖下彈之
曲終泣然曰五絃絕於斯乎父母怪問之淑貞曰城陷必遭辱不
如早死明日賊至其居臨東湖遂溺焉水淺不得死賊抽矢脅之
上岸淑貞不從賊射殺之同郡李宗頤妻夏婉常亦儒家女賊至
挾其女其投井死

周烈女年十九未適人父如砥曾爲紹興新昌典史至正二十年
鄉民作亂如砥與女避於邑西之客僧嶺女爲賊所執欲以爲妻
曰我周典史女也死卽死豈能從汝賊怒殺之

趙氏女平陽人年二十未嫁寇亂趙被驅迫以行度不免給賊曰
吾取所藏金以遺汝賊信之遂還投於廁而死

張氏女高郵人城亂賊知女有姿艷叩其家索之女方匿復壁閒

賊將害其父母女不得已乃出拜賊賊即伏地呼其父母為丈人媪而以女行女欣然從之過橋投水死又有龍泉湯嬌美姿容未嫁賊殺其父母以刃脅之嬌即以頭觸刃賊怒殺之

張玉娘字若瓊松陽張懋女也懋仕宋為提舉官玉娘生有殊色敏慧絕倫字沈荃玉娘中表也已而懋欲背盟玉娘誓不相負未幾荃宦游京師而卒玉娘恍惚見夢與相訣即悲泣以死父哀其志乃請於沈氏合葬焉玉娘詩有名於時自號一貞居士侍女紫娥霜娥皆有才色善筆札玉娘亡皆以身殉所畜鸚鵡亦悲鳴而死

郭氏大名人王德政妻也少孤事母張氏孝謹以女儀聞於鄉及笄富貴家慕之爭求聘張氏不許時德政教授里中年四十餘貌甚古陋張氏以貧不能教二子欲納德政為女婿使教之宗族皆不謂然郭氏慨然順母志既婚於德政相敬如賓教二弟有成未幾德政卒郭氏年方二十餘厲節自守大德間旌之

崔氏周朮思妻也從夫官平陽金將來攻城克之下令官屬妻子敢匿者死時朮思以使命在上黨崔急抱幼子楨以詭計自言於將將信之使軍吏書其臂以出崔曰婦人臂使人執而書非禮也以金賂吏使書之紙吏曰吾知汝誠賢婦然令不敢違命崔自搯袖吏懸筆而書焉既出有言其詐主將怒命追之崔與楨伏土窖三日得免既與夫會未幾夫病亡崔大慟柩前放散婢僕躬自紡績悉以貲產遺親舊有權貴使人諷求娶輒自爬毀其面四十年未嘗妄言笑預吉會人比古烈婦云

聞氏紹興人俞新之妻也大德四年新之歿聞尚少斷髮自誓父不能強姑久病風且失明聞氏手滌廁廕不怠時漱口上堂舐其

元書 卷九十四 六
目目爲復明及姑卒與子親負土葬之朝夕悲號聞者慘惻鄉里甚嘉其孝爲之語曰欲學孝婦當問俞母又有劉氏渤海李五妻少寡父母使再嫁不從舅病疽劉禱於天數日潰吮其血乃愈旣而親挽小車載舅詣嶽祠以答神貺

趙孝婦德安應城人早寡事姑孝家貧傭織於人得美食必持歸奉姑自啖粗糲不厭嘗念姑老一旦有不諱無由得棺乃以次子鬻富家得錢百緡市杉木治之棺成置於室適南鄰失火將及門孝婦亟扶姑出避而棺重不可移乃撫膺大哭曰吾爲姑賣兒得棺天獨不憫之乎言畢風回家得不焚人以爲孝感所致

只魯花真蒙古氏年二十六夫忽都病卒誓不再醮孝養舅姑逾十五年舅姑歿塵衣垢面廬墓終身至元閒旌之其後又有翼城宋仲榮妻梁氏舅歿負土爲墳懷孟何氏大名趙氏竝以夫歿守

志養舅姑以壽終負土成墳高三丈餘

朱淑信山陰人少寡誓不再嫁一女妙靜幼哭父目並失明及長擇耦者不至家貧歲凶母子相依以苦節自勵士人王氏貴重其孝乃求娶焉

周氏安西人張興祖妻也年二十四興祖歿舅姑欲使再適氏弗從曰妾家祖父皆早世妾祖母妾母並以貞操聞妾或中道易節是忘故夫而辱先人也忘故夫不義忘先人不孝不孝不義妾不敢爲妾居三十年奉舅姑生事死葬無違禮其父與外祖皆無後葬祭之禮亦周氏主焉

林氏甯海人任仲文妻也家甚貧年二十八而寡姑患風疾不良於行林氏旦暮扶持惟謹撫育三子皆有成年百有三歲卒

白氏太原人夫棄家爲僧白氏年二十留養姑不去服勤織紝以

供日膳夫一日還迫使他適白斷髮誓不從夫不能奪乃去姑年九十卒竭力營葬畫姑像祀之終身

焦氏涇陽人袁天祐妻也初天祐祖父皆從軍歿祖母楊氏母焦氏並家居守志至元二十三年天祐復從征死甘州焦氏年少宗族欲改嫁氏哭曰袁氏不幸三世早寡自祖姑以來皆守節豈可至吾而廢吾生爲袁氏婦死則葬袁氏土爾終不能改容事他人也眾不敢復言

郎氏湖州安吉人宋進士朱甲妻也甲嘗仕浙東以郎氏從至元閒甲歿郎氏護喪還至玉山里留居避盜勢家柳氏欲強聘之郎誓不從夜棄裝奉柩遁柳邀之中道以死拒得免家居養姑甚謹姑嘗病郎禱天刲股進啖而愈

霍門二婦尹氏楊氏鄭州人至元閒尹夫耀卿歿姑命其更嫁尹

曰婦之行一節而已再嫁而失節妾不忍爲也姑曰世之婦皆然汝何獨恥之有對曰人之志不同妾知守妾志爾姑不能強及楊夫顯卿繼歿慮姑欲其嫁卽先白姑曰妾聞姊姒猶兄弟也宜相好今姒旣留妾豈可獨去願與其終事吾姑姑曰汝果能是吾復何言同處二十餘年以節孝聞

段氏隆興人霍榮妻也榮無子嘗乞人爲養子榮卒段氏年二十六養舅姑以孝聞舅姑歿榮諸父仲汶貪其產謂段曰汝子假子也可令歸宗汝無子宜改適霍氏業汝無與焉段曰家貲非所計但再醮非義尙容妾思之卽退入寢室引針刺面墨漬之誓死不二大德二年府上狀中書給羊酒幣帛仍命旌門復役又有興和吳氏自刺其面成紀謝明妻趙氏自髡其髮冀甯田濟川妻武氏溧水曹子英妻尤氏齧指滴血並誓不更嫁俱爲有司所旌

劉氏順甯人臺叔齡妻也粗知書克修婦道一日地震屋壞壓叔齡不能起家復失火叔齡母前救不得欲就焚叔齡望見呼曰吾已不可得出當亟救吾母劉謂夫妹曰汝救汝母汝兄必死吾不用復生矣卽自投火中死火滅家人得二屍燼中猶手相握不開官嘉其烈上於朝命錄付史館

蘇氏真定人武用妻也用疾蘇刲股和粥以進疾卽愈生子德政四歲而寡夫兄利其貲欲嫁之不聽未幾夫兄舉家死惟餘三弱孫蘇氏取育之如己子及德政長事蘇至孝當蘇死時天大旱德政方掘地求水以供葬事忽二蛇躍出德政因默禱焉二蛇一東一北隨其地掘之果得泉人謂蘇氏孝義之報

丁氏新建人鄭伯文妻也伯文病將歿丁氏與訣曰妾得侍巾櫛誓與偕老然君疾革矣脫有不諱妾當從但君父母已老無他子

婦侍養妾苟復自亡則君亦不瞑目妾且忍死以奉其餘年伯文卒氏年二十七居喪哀毀倍常服旣除父母屢議嫁之氏每聞必慟哭曰妾所以不死者非苟生也與良人約將以事舅姑耳今舅姑在堂妾可棄去而不信於良人乎遂止

馮淑安字靜君湖州錄事汝弼女爲汶上李如忠繼室如忠任山陰縣尹生子仕而病革謂馮曰吾已矣其奈汝何馮引刀斷髮自誓不他適如忠卒於官踰兩月復生一子名伏而如忠前娶蒙古氏之族在北者聞如忠歿多宦貲率李族人來山陰悉索其財並挾前妻所遺子任以去馮不與較惟兩柩在室久之鬻衣權厝載山下攜其二子廬墓側時年始二十爲女師以自給教二子皆成學居二十年始護喪歸葬汶上齊魯人聞之莫不歎息仕伏亦事母極孝後皆掾大府有廉直聲

柴氏晉甯人秦閏夫繼妻也閏夫前妻遺一子尚幼柴氏鞠如己出未幾柴氏有子而閏夫病且死屬柴氏曰我死汝能撫二子成立則我亦無憾矣閏夫死家甚貧柴勤紡績遣二子就學至正十八年賊犯晉甯其長子爲賊驅迫在圍中旣而得脫初在賊時有惡少與張福爲仇往滅其家及官軍至福訴其事事連柴氏長子法當誅柴氏引次子詣官訴曰往從惡者吾次子非長子也次子曰我之罪可加於兄乎鞠之至死不易其言官反疑次子非柴出訊之他囚始得其情官義柴氏乃判曰婦執義不忘其夫之命子趨死而能成母之志此天理人情之至也並釋之時人皆以爲難事聞命旌門而復其家

程鵬舉妻某氏宋季鵬舉被俘於興元張萬戶家爲奴張以所獲宦家女妻之旣昏三日竊謂曰觀君才貌非久在人後者何不爲去計鵬舉疑其試己也訴於張張箠之越三日復告曰君若去必可成名否則終爲人奴耳鵬舉又訴於張張命出之臨行以所著繡鞵一易程一履泣日期執此相見程感悟逸去至元時積官陝西參政自與妻別已三十餘年遣使攜鞵履往興元求之知己乞身爲尼使者至菴中以曝衣爲由故遺鞵履在地尼見之詢所從來對曰吾主程參政使尋其偶耳尼出鞵履示之使卽拜曰主母也尼曰鞵履復全吾願畢矣歸見程相公與夫人爲道致意告以參政未嘗娶終不出程檄興元路官具輿送至陝西重爲夫婦張義婦濟南鄒平人年十八歸里人李伍伍與從子零成福甯未幾死張養舅姑甚摯父母舅姑病凡四割股救不懈及死喪葬無遺禮旣而歎曰妾夫死數千里外妾不能歸骨以葬者以舅姑父母在無所事故也今不幸皆以物故而夫骨終暴棄遠土使無妾

卽已妾在敢愛死乎乃卧積冰上誓曰天若許妾取夫骨雖寒甚當得不死卧冰逾月如初鄉人異之乃相率贈錢大書其衣以行行四十日至福甯見零問夫葬地則榛莽四塞不可識張哀慟欲絕夫忽降靈於童子言動無異生時告以死時事甚悲且指示骨所在張如其言發得之持骨祝曰爾信妾夫耶入口當如冰雪黏如膠已而果然官義之上於大府使零護喪還給錢以葬仍旌門復其役又有定遠徐氏夫史五爲義兵百夫長戰死氏求夫積屍中莫能識以口吮血辨驗得實載之歸治大棺將斂乃沐浴自經其側

茅氏崇明人朱虎妻也大德間虎官都水監坐罪籍其家吏錄茅氏及二子送京師大醫提點師甲乞歸家欲妻之茅氏誓死不從母子三人以裾相結連晝夜倚抱號哭形貌銷毀師知不可奪釋之茅氏託居永明寺憂憤不食卒

貴哥蒙古氏同知宣政院羅三十五妻也天祿初夫以事貶海南籍其家詔以貴哥賜近侍近侍親率車騎至其家迎之貴哥度不免令僕具酒肴延於廳事如廢自經死

郭烈婦天台戍卒妻也千戶李某駐天台見而豔之乃遣卒出防私盜而日調婦郭氏毅然莫犯及卒歸具以白卒以部下故未敢言一日李過卒門卒憶前事卽大怒挺刃出而李幸脫卽訴於縣縣以其持刃殺本管官也繫獄擬死郭氏日常躬饋食於卒而閉戶業紡績以資衣食久之有新至獄卒葉姓者有意於郭氏乃繆盡情於卒顧視而飲食之親若手足卒深感激之適傳卒將決葉遂以言動卒而令郭氏得私見卒謂曰我死有日此葉押獄性柔善未有妻汝可嫁之俾善視吾子也郭氏曰汝之死徒以我故我

又二適以求生乎歸卽持二幼痛泣言曰汝父行且死我死亦在
旦夕我今賣汝與人以免饑寒非若父母膝下比也其子女引母
裾而號不肯釋行路亦爲之墮淚邑人有憐之者納其子女贈錢
三十緡郭以三之一具酒饌攜至獄門葉聽入始哽咽不能語旣
而曰君擾葉押獄多矣此可少相答又告以有錢若干可取給我
在一富家執作恐旬日不及視君也泣別而出卽走仙人渡溪水
中危坐而死渡水甚險惡竟不爲衝仆有司知之乃爲具棺斂就
葬於溪側山下又請諸上官表其墓曰貞烈郭氏之墓奉使宣撫
廉得其事原卒之情釋之人遂付還子女卒終身不再娶
高麗氏平章政事闊闕歹妾也闊闕歹物故氏誓不二適正室子
拜馬歹兒悅其色援國俗欲妻之而不可乃以其父所有大荅納
珠環獻於太師伯顏伯顏喜問所欲遂白前事伯顏特爲奏聞得

旨令拜馬歹兒收繼小母高麗氏高麗氏聞之夜與親母踰垣出
削髮爲尼伯顏大怒以其違旨也奏請省臺及侍正府鞫問諸官
畏伯顏之威鍛鍊慘酷時侍正府都事帖木兒不花知鞫問官中
惟國公闊里吉思獨秉權力乃數致語曰誰無妻子安能相守至
死爲人妻妾守節如此而坐以罪恐非我治朝之盛典也闊里吉
思悟爲宛曲言於伯顏事遂已帖木兒不花仕至監察御史
沈氏吳興人夫爲軍士所害沈有殊色畧置快船小溪流迅急乘
閒投水中船去疾意其已歿不及顧適張掾舟過見婦人衣流水
上引救之易衣置後艙內其下諷之曰吾張君今貴人汝能侍之
且得幸沈曰幸諸君見憐然彼時見吾夫被創甚吾心已許之恨
不及生時使之見也且貴人安用失節婦哉夜二鼓視旁有竹箸
卽取一納口中面力觸舟箸遂入喉而死明日張爲斂而焚之

龍氏永新人左幼白之妻也幼白少負文名有志略試有司不利以父蔭爲江西廣濟庫使卒於軍時龍氏年二十九卽剪髮勺水不入口柩至迎於十里外徒跣號痛親挽舟以前哭奠五年不離几席嘗折海榴一枝插瓶中供几上旬日視之根柢勃然家人移植於庭遂長茂鄰婦感慕皆效節不嫁翰林承旨歐陽原功爲書榴萱二字以表之子曰善曰詠皆力學以世其家

王氏大都人張買奴妻也年十六買奴官錢唐病死葬城西十里外氏每旦披髮往奠伏墓大慟久而致疾服闋舅姑欲嫁之氏曰父母命妾奉箕帚於張氏此足豈可復履於他人門乎遂瑩居三十年而卒

王氏遼陽人李君進妻也大德八年君進病卒卜葬將發引親戚鄰里咸會王氏謂眾曰夫婦死同穴義也吾得從良人逝不亦可乎因撫棺大慟嘔血升餘卽仆地死眾爲斂之與夫連柩出葬送者數百人莫不洒涕大甯趙哇兒妻蕭氏哇兒病劇謂曰汝年少若之何對曰君幸自寬脫不諱妾不獨生遂命匠製巨棺夫歿卽自經死家人同棺斂焉又有孟志剛妻衣氏貧而無子夫死官爲給棺衣說匠令大之是夕具雞黍祭其夫而以家之所有悉散諸鄰里及同居王媪曰吾大其棺欲其葬也遂自剉葉縣李青妻張春兒亦夫婦以大棺共葬移刺氏同知湖州事耶律忽都妻也夫歿割耳自誓旣葬廬墓側悲號不食死鈞州侯氏夫曹德死亦縊於墓側

王氏內黃人趙美妻也至治元年美溺水死王氏誓守志舅姑念其少無子欲使更適氏曰婦義無再醮且舅姑在妾可棄去耶舅姑欲以族姪與繼昏氏拒不從迫之力氏知不免卽自經死又有

李冬兒甄城丁從信妻也年二十三從信歿服闋父母呼歸問之曰汝年少居孀又無子當爲汝再擇婿冬兒不從乃詣從信冢欲縊樹上家人防之不果日暮還家二鼓更新衣自縊死李氏濱州惠高兒妻也年二十六高兒死父欲奪歸嫁之李亦自縊死范妙元年二十一歸奉化江文鑄及門未合壻夫忽以癩卒范曰我旣入江門卽江婦也遂居其家撫諸姪江森江道如己子卒年九十五柳氏薊郡人爲戶部主事趙野妻未婚而野卒兄將更嫁之柳曰業已字趙矣雖死豈有他志後寢疾不肯服藥曰我年二十六而寡今已逾半百得死幸矣遂卒王氏大都人惠士元妻也士元病革屬王氏曰我疾必不起前妾所生子汝善保護之稍長從汝自嫁氏泣曰君何出此言妾義當死豈復有他說乎士元卒比葬氏遂居墓側以妾子置左右時其

飲食寒煖歲餘妾子竟死氏乃哭曰無復望矣終喪親舊皆攜酒醴祭士元於墓祭畢眾欲行酒氏已經死於樹良鄉王氏夫費隱有疾屬曰我一子一女雖妾出汝必善撫之遂歿氏居喪撫其子女旣而子又死服除乃執女手曰汝已稍知人事管鑰在此汝自司之遂相抱痛哭是夜縊死園中瑞州李馬兒妻袁氏年十九夫歿里中勢家謀娶之袁曰吾聞烈女不二夫也卽往夫墓哭自縊於樹下

劉氏河南彰德人夫齊關爲千戶戰死澤潞閒劉貧無所依有強議婚者劉陽曰吾三月三日有心願償畢當從汝言是日徑往天甯寺登浮屠祝天曰妾本河南名家女遭世亂適湖南齊關爲妻今夫已死不敢失節遂投地而死

傅氏諸暨人年十八適張瑜瑜以軍興期會迫死道上訃至傅匄

匍匐屍歸號泣三日夜屍有腐氣猶依之呵舐冀其復蘇已入棺至齧棺成穴及葬投身壙中母強挽之出屬侍婢謹視之閱數日給婢理沐具既而失所在徐見二足倒植井中乃傳也
秦筆妻江陰村女也筆遭亂挈妻依同郡朱判官瑠居吳中筆病卒貧無以斂瑠爲具棺衾且思所以卹養其妻其妻覺泣謝曰良人筆生以藝游搢紳閒詩書禮義之教妾亦嘗與聞矣妾以未亡故有累鄉長者在長者義妾於其義何瑠加慰之夜漏半哭益哀忽自經筆死所瑠爲合葬而表其墓

吳妙甯海上人年二十一贅張姓子越四載邑大姓以叛黨連坐其父甯泣曰吾父苟無地能解族其赤矣吾不遘死禍延良人卽自投於纒俄徵繫吏至聞已没喑異而去時人爲之謠曰紅羊年黑鼠月張婦吳儼遺烈九山風酸泐波血二氣舛錯愁雲結一樹

梅花驚飄雪

周芙本細家息江陰孔胥妻也孔素爲害鄉曲一日舟過塘上鄉人僞邀飲強醉奪舟以搆賊訴於官胥度不免密書於芙早爲計庶絕軍配族黨難之芙覘得故神色不亂言笑如平時乃備酒饌祭舅姑延親故劇飲是夕素服雉經死胥聞之曰吾無憾矣
張貞建康張效女嫁周曹爲妻曹以復入公門刺面庾死先是貞在徙籍中懼配軍投秦淮河卒及曹屍過其處貞忽湧浮水面神色踰五日不變識者曰此張訓導女也殉夫藏聚寶坑舅姑能無念乎聞者哀之

吳良正義烏儒家女未笄歸里中童師姑嗜醜醜家故貧必力致之沾醉乃已紅巾賊至家人皆鼠竄吳獨侍側人呼曰汝不愛頭乎吳曰姑在將安之居無何姑歿瀕葬會邑人構亂殺人斂貨人

勸如前吳曰姑骸未入土妾就刀下死不悔撫棺長痛眾義釋之去同邑賈善妻宋嫔性沈默家饒於財平日事賈甚謹明兵駐蘭溪賈攜嫔避浦陽鄉中無賴乘時肆掠俄突至嫔懼侵已擲袖銀於地脫身投澗死

劉翠哥房山人李仲義妻也至正二十年縣大饑平章劉哈刺不花兵乏食執仲義欲烹之翠哥訴曰吾夫瘦小不足療飢吾聞婦人肥黑者味美願就烹兵釋其夫而烹劉氏聞者哀之

姚氏餘杭人居山谷間夫出刈麥姚居家執爨母何氏往汲澗水久而不至俄聞覆水聲亟出視則虎銜其母以走姚倉卒往逐之即手毆其脇鄰人競執器械以從虎乃置之而去姚負母以歸求藥療之奉養二十餘年而卒又方甯妻官勝娘者建甯人甯耨田勝娘見一虎方攫其夫勝娘即棄耨奮梃連擊之虎舍去勝娘

負夫至中途而死有司旌復其家建德王氏女者父出耘田為豹所噬曳之登山女識父呼聲驚出救以鋤擊豹腦殺之父乃得生又胡烈婦渤海劉平妻至元七年平戍棗陽車載其家以行夜宿沙河旁有虎至銜平去胡覺起追及之持虎足顧呼車中七歲兒取刀刺虎洞其喉遂奪夫還至棗陽僅三日死縣官言狀亦命復其家而旌其門

徐君寶妻某氏岳州人被掠來杭相從數千里其主者數欲犯之終以計免一日主者怒甚即將強焉氏告曰俟妾祭謝先夫然後為君婦主者喜諾即凝妝焚香再拜南向飲泣題滿庭芳詞一闋於壁曰漢上繁華江南人物猶餘宣政風流綠窗朱戶十里爛銀鉤一旦刀兵齊舉旌旗擁百萬貔貅長驅入歌樓舞榭風卷落花愁清平三百載典章文物掃地俱休幸此身未北猶客南州破鏡

元書 卷九十四
徐郎何在空惆悵相見無由從今後斷魂千里夜夜岳陽樓卽投
大池中死

胡妙端嗾祝某妻也爲苗軍掠至金華義不受辱乘閒齧指血題
詩壁上赴水死苗帥亦服其節爲立廟祠焉邑人顏曰烈婦廟詩
曰弱質空懷漆室憂搜山千騎入深幽旌旗影亂天同慘金鼓聲
淫鬼亦愁父母劬勞何日報夫妻恩愛此時休九泉有路還歸去
那箇雲邊是越州又有黃元琇江陰知事朱道存妻也先是江陰
亂元琇依父居松江爲苗所掠欲驅迫就道元琇攀檻厲聲曰苗
狗遂遇害爪入楹木血蹟存焉謝蠲亦松江人從夫遁亦爲苗掠
不屈死吉水李氏行軍鎮撫彭九萬妻及其子友諒皆大罵苗被
殺賀氏永新州人適何姓斬兵入吉安殺其夫將污之賀曰竊聞
帥令嚴淫虐者斬以徇汝獨不懼徇乎兵以言諸帥帥議聘焉居

期帥且至賀閉戶不納齧指血題詩曰涇渭難分清與濁妾身不
幸死紅巾孤兒尙忍更他姓烈女何曾事二人白刃自揮心似鐵
黃泉欲到骨如銀荒村日落猿啼處過客聞之亦愴神遂引刀自
剄死然端坐不仆帥排戶見之驚去

朱錦哥洛陽人趙彬妻也西兵援上都至河南兵不能悉守紀律
猝執錦哥逼與亂卽給曰汝幸釋我舍後有瘞金當發以遺汝兵
信之隨其行錦哥得近井卽抱三歲兒湧身赴井死又有王氏博
興人焦士廉妻也毛貴亂山東官軍競出掠王氏被執亦給曰我
家墓田有藏金可共取信之隨至墓所氏哭曰此我死所非藏金
所也遂與妾杜氏皆遇害

蔡三玉龍溪人陳端才妻也寇掠其里里媪集諸婦女同舟避難
寇追及三玉亟以水漬衣寇以其有姿色欲污之三玉給曰衣溼

更求衣矚賊取衣自投水死寇曰溺者必躍以長竿絡鈎俟其躍而舉之竟不起越三日其父廣瑞舟次上流屍遂逆流附父母揮之不去移舟溯河而上屍從之上者三父異甚取而視之則其女也收斂之又有石梁陳氏適柯姓爲海寇執以登舟氏大罵忽振厲自投江中死其父方卧病見女至呼之不應該曰吾豈夢耶既有自賊歸者言其死狀乃知其鬼也明日屍亦逆流而上止岸旁時盛暑屍已變其夫驗其背有黑子乃慟哭曰是吾妻也昇歸斂之高郵高氏婦攜其女從夫出避亂道旁空舍中脫金纏臂與女且語夫須疾行夫挈女稍遠乃解足紗自經賊至焚其舍夫抵儀貞夜夢婦來告曰我已死彼舍矣其精爽如此

張氏龍泉人年二十七夫湯輝以兵亂先移其家財入山砦與母共守輝父以疾未行張歸任藥膳卽以輿自隨既而賊至卽命以輿載其舅而已遇賊賊以刀脅之張卽奪其刀自刺死又嚴州童氏俞士淵妻也姑性嚴待之寡恩童氏柔順無少拂至正中賊來陷威平官軍復之已乃縱兵剽掠至士淵家氏以身蔽姑眾欲污之氏大罵不屈一卒擊斷其左臂不屈又一卒斷其右臂罵猶不絕眾乃破其面而去

禹淑靜字素清紹興人吳守正妻也後徙嘉興石門鎮盜至淑靜登舟以避有盜數輩奔入其舟將犯之淑靜抱幼女投河死

毛氏松陽人美姿色隨夫避亂麻鷺山中爲賊所得迫之曰從我多與爾金毛曰甯剖我心不願汝金賊以刀磨其身氏大罵曰碎

丹賊汝碎則臭我碎則香賊怒剗其腸而去

蔣德新徽州歙人羅宣明妻也蘄寇起宣明散家貲募兵徽城數陷屢復之未幾元帥沙不丁治徽下令宣明命分築城百二十丈

時宣明家已罄德新盡售奩中物助之始畢役而賊復至宣明欲
 德新從已軍中德新以其兄弟在香山有寨柵可守因往依之宣
 明往乞師行省賊恨宣明誦知其妻孥在香山也益力攻之寨破
 德新出走遇賊大罵賊舂以刀墜崖死子曰驢兒馬兒驢兒甚幼
 亦罵賊死其奴詹寄等不去皆被殺賊退德新兄子求其屍崖下
 面如生而馬兒在衣篋中抱以歸宣明

李氏汴梁人年二十餘有姿色適同邑丁尚賢無何賊至欲污之
 氏怒曰吾家六世義門豈能從賊以辱身乎闔門三百餘口均被
 害呂孀婦陵州呂彥能姊也久居彥能家賊犯陵州姊曰我喪夫
 二十年又無後不死何待苟辱身則辱吾弟矣赴井死彥能妻劉
 氏曰妾為君家婦二十八年茲不幸逢亂離必不負君於是彥能
 二女及子婦王氏二孫女皆從而溺一門死者七人

丁月娥孝子丁鶴年姊也鶴年在隱逸傳月娥少聰慧幽靜誦說
 諸經通奧義及長歸葛通甫事上撫下懍如禮法冢婦盧見月娥
 德逾己一日率諸婦諸女屬月娥教詔之月娥紉箴之際必教以
 婦道及援引古烈女示以為則既而江西寇羣起郡邑悚懼盧曰
 郡有城郭可恃兵可守因使月娥挾諸女婦避諸郡城未幾城忽
 陷月娥歎曰吾生簪組世家其忍出犬彘下耶遂抱所生女赴水
 死諸女婦咸驚愕言曰姆之死安於義吾可幸免乎哉亦相與死
 水中凡九人莫有後者時夏暑方熾屍七日顏色如生郡人靡不
 嗟異邑父老議曰十節同志死不可異壙乃於故居之南黃池里
 作巨穴同葬焉題其石曰十節墓

齊氏太原王履謙妻也治家嚴肅克守婦道賊陷太原齊氏與二
 婦蕭氏呂氏及二女避難於趙莊石巖俄賊至度不免願謂二女

元書 卷九十四
曰汝家五世同居號爲清白豈可虧節辱身長女曰吾夫已死今爲未亡人得死爲幸呂氏曰吾爲中書左丞之孫義不受辱齊氏大哭乃與二婦二女同投崖死

也先忽都蒙古氏大甯路達魯花赤鐵木兒不花之妻封雲中郡君夫坐事免官居大甯紅巾賊至也先忽都與妾玉蓮走尼寺中爲賊所得令與眾婦縫衣拒不肯賊嚇以刃罵曰我達魯花赤妻也汝曹賊耳我不能爲針工以從賊賊怒殺之玉蓮亦自縊死其子完者帖木兒年十四爲賊所掠久之逃歸訪母屍及玉蓮並葬焉

蕭氏濟南人劉公翼妻也有姿容通書史毛貴兵將壓境豫與夫謀曰妾詩書家女誓以冰雪自將儻城陷被執悔將何追妾以二子一女累君去作清白鬼於泉下夫曰事未至何急如此居無何城陷蕭解條自縊死

安正同磁州人平章政事祐女孫也夫王時以參知政事分省太原安從之任踰年城陷眾皆走安與其妾李氏同赴井死追贈梁國夫人謚莊潔

吳氏湖州人適楊氏有殊色年二十五明兵將逼城吳懼污辱乃先攜二子投茗水中逾月城破父媪見其母子並浮若不相離狀咸嗟異焉

趙氏鄞處士陸燾妻也至正間燾攜妻隱居松江瓢湖無何海寇猝至夫婦倉皇赴舟未遠同難者爭舍舟陸竄燾登岸將復攜趙行兵偪之傷刃者三遂仆深淖趙躍身赴淖同死時有歌之者曰四月三日兵繞湖婦女多被辱與驅殉節伊誰天水姝蓋獨賢之也

李哥霸州倡家女年十三母教之歌舞哥泣曰女率有工繫我獨爲此乎母告以倡業不可廢哥曰若此聽母母亦當從我好自是不粉澤茹葷所歌多道情仙曲有召者必問主賓姓名乃往人亦相戒無戲狎孟津監縣賂哥母夜抵室哥懷利刃置卧內曰汝職風化首而狗羯行恐血污吾刃也監慚去明日知州聞之曰此閒有貞女而吾不知是吾過也吾子明經舉秀才真若配以禮娶之未幾紅巾入寇夫婦皆見執寇見哥美將殺其夫而取之哥前抱夫頸大呼曰吾斷不斯須求活遂並殺之

潘妙圓山陰人徐允讓妻也與夫從舅避兵山谷閒舅被執夫泣救得免賊遂殺其夫因欲辱潘潘給曰我夫旣死我從汝必矣若能焚吾夫庶可無憾賊信之聚薪以焚火旣然潘且泣且詬遂投火死同邑黃元珪妻俞氏值寇火其廬將擁之去氏亦躍入火中

死又有諸暨王琪妻蔡氏以寇猝至投入造紙鑊中糜爛死

曹氏茶陵州人父德夫教授湖湘閒有于同祖者有聲諸生中因以女妻焉及茶陵陷聞婦女多被驅逐迫謂其夫及子曰是尙可全生乎我義不辱身以累汝顧舅年老汝等善視之遂自經死妾李氏驚抱持之不得亦引兵自剄絕而復蘇曰得從小君地下足矣是夕死時又有宋氏翰林直學士宋褰女永平王宗仁妻也永平被兵宋從夫避難鐔子山俄皆爲軍所掠有窺宋美欲害宗仁者宋顧謂夫曰我不以身累君遂攜一女投井死申氏冀甯人李宏益妻也冀甯陷申語宏益曰君甯速去無以我相累若賊入吾室必以妾故害及君矣言訖亦投井死宏益得免於難再娶安氏居二歲而宏益卒泣謂諸親曰夫死雖生何益乃竊入寢室膏沐薰裳自縊於柩側

羅妙安信州弋陽人幼聰慧能暗誦列女傳年二十歸同邑鄭琪琪家世宦族同居百餘口羅執婦道無閒言琪以軍功擢鉛山州判官至正二十年信州陷妙安以弋陽去信近恐不免輒取所佩刀淬礪令銛甚琪問何爲對曰時事如此萬一遇難可爲自全計已而兵至羅卽自刎

徐氏天台人狄恆妻也恆方歿徐當哀痛閒而鄉民爲亂避難牛囤山爲賊所執驅迫以前徐曰吾渴甚欲求水一杯賊令自汲卽投井中死時年十八

李賽兒房山人王士明妻也叛軍至縣賽兒及其女李家奴皆被執士明隨至軍軍怒逐之賽兒謂其女曰汝父旣逐吾與汝必不得脫與其受辱不如死女曰母先殺我賽兒卽以軍所遺鐮刀殺其女遂自殺

陶宗媛台州人杜思綱妻也歸杜四載夫亡守節台州被兵宗媛方居姑喪忍死護柩爲游兵所執脅之媛曰我若畏死豈留此耶任汝殺我以從姑於地下耳遂遇害其女弟宗琬弟妻王淑亦皆赴水死

劉氏藍田人夫張納爲監察御史早卒氏守志家居河東受兵二子衡衍俱以事出度不能自脫遂與二婦孫氏姚氏決死盡發貲囊分給家人婦姑同縊焉又有華氏大同張思孝妻貌高兵亂爲所掠以不受辱見殺其婦劉氏僵壓姑屍大罵不已兵並殺之家入斂其屍婦姑猶手相持不舍

劉氏順州人夫安志道及劉氏之弟明理並登進士第劉避兵巖穴中賊至欲污之叱曰我弟與夫皆進士豈受汝辱賊以刀磨其體劉大罵不輟賊怒鈎斷其舌含糊而死

劉冀之衡水人曹泰才之妻也年十二通古文孝經見小學書固請讀之母不許一日聞諸兄誦內則至姆教婉婉聽從復請於母曰此亦女子事遂通內外篇及笄適曹五月紅巾陷河朔曹故大家避兵城西聊城村賊掩至大掠見劉美輒驅去劉不可賊乃出金珠置前被以文綺劉手裂之賊擁上馬墮地者數四賊怒繩其項繫馬後曳之劉以爪據地頭觸石流血罵賊死

黃氏宜陽人年十六爲鍾秉敬妻才美相匹秉敬父義昭雄勇當紅巾賊起父子咸挺奮敢於殄寇鄉民賴保完者數萬戶旣而盜大至父子戰死居五六年有賈寇聞鍾婦美欲強室之以兵躡其里黃隨里人匿石洞中曰汝等同禍以我故然義不可令鄉里同死吾當自爲計遂出臨小石潭卽自投潭中眾遽救幸不死乃誑白賈投潭中死矣賈怒曰死以其首至眾懼無計或曰婢雪兒尤

豔可令之代乃飾婢使出拜曰此鍾相公女也願以獻賈喜以去號之曰娘子黃氏得免然竟以悻卒

朱氏杭州人黃仲起妻也張士誠寇杭州其女臨安奴倉皇言曰賊至矣我別母求一死也俄賊驅諸婦至其家且指朱氏母子曰爲我守之曰暮當至朱氏遂與女自縊死妾馮氏見之歎曰我生何爲徒取辱耳亦縊死繼而仲起弟妻蔡氏抱幼子與乳母湯氏皆自縊於室

趙氏大都人宋謙妻也明兵破大都趙氏子婦溫氏高氏孫婦高氏徐氏皆有姿容合謀曰兵且至我等豈可辱身以苟全趙卽自經死諸婦四人諸孫男女六人眾妾三人皆赴井死

卜顏的斤宗王黑閭之女大都破時謂其夫觀音奴曰我乃國族且年少必不容於人豈惜一死以辱國家遂自縊時張棟妻語家

人曰吾爲狀元妻義不可辱赴井死又有金氏詳定使明州徐程妻也亦懼辱願謂其女曰汝父出捍城我三品命婦汝儒家女又進士妻宜早爲計遂同赴井死

阿禧主梁王女大理總管段功妻也功事在段興智傳功以援梁王敗明玉珍兵梁王喜奏授雲南平章政事而妻以阿禧主功自尙主卽留善聞戀戀不肯歸其大理夫人高氏寄樂府促之始還未幾復來或譖之梁王曰段平章此來有吞金馬咽碧雞之心矣梁王密召阿禧謂曰功志不滅我不已今付汝孔雀膽可乘便圖之主潛然私語功曰吾父忌阿奴矣願與阿奴西歸因出毒具示之功不聽明日邀功東寺演梵陰令番將格殺之阿禧主聞之大哭欲自盡梁王輒防之主愁憤作詩曰吾家住在雁門深一片閒雲到滇海心懸明月照青天青天不語今三載欲隨明月到蒼山

誤我一生路裏彩吐嚙吐嚙段阿奴施宗施秀同奴歹雲片波潏不見人押不蘆花顏色改肉屏獨坐細思量西山鐵立霜瀟灑竟死功女僧奴將適建昌阿黎氏出手刺繡文旗屬功子寶曰我自來束髮聞母稱父冤恨非男子不能報此旗所以識也又作二詩留贈辭可稱焉

脫脫懷氏副樞密燕帖木兒妻明兵入雲南燕帖木兒敗馳歸氏閉門不納曰爾受梁王厚恩兵敗不死何以見爲乃鳩其二子一女命侍者曰我死爾舉火焚屋遂飲酖卒

徐倡不知何許人紅巾寇常州有叛將召之佐飲徐憤懣不聽指使題詩座上曰平康巷裏掌中身翠舞珠歌玉樹春樂籍不除今義死天教倡婦媿降臣叛將怒寸磔之又李翠娥維揚名倡也石萬戶納置別業石沒李誓不適他姓終日閉閣誦經而已年及七

十餘萬戶子孫遇歲時咸往拜之樂籍中相傳以爲盛事又有王巧兒京師上色也陳同知善之攜至杭陳卒奉正室鐵氏以清慎勤儉終其身汪憐憐湖州名妓也經歷涅古伯常屬意焉遣媒妁並財禮娶之經三載涅古伯死汪祝髮尼寺有訪之者故毀其身形以絕狂念卒老於尼

李金兒濟南章邱人李素女也少慧敏日誦千言其父得張明遠醫卜之傳金兒盡受其術而更造元妙言人禍福輒響應父自以爲不及也後旅寓盱眙張士誠陷泗州李一門被掠金兒年未及笄隸士誠母曹氏帳下爲侍兒國兵圍士誠於高郵墮其外郭勢甚岌曹氏將遣人問卜金兒自言能之卦遇需之坎曰惟需於泥其利用恆堅忍則不敗時當冬夜忽聞殷雷發城中金兒起賀曰明日可出戰矣明日總兵丞相脫脫被黜軍潰士誠擊走之軍勢

大振由是軍中悉稱姑姑明年江陰朱英以其黨仇殺來求援士誠始疑不敢應金兒卜之吉且曰江雖險當有助已而福山曹氏果發江船百艘載牛酒迎之遂徑渡江至平江初士誠起自羣盜無遠志至是自謂有天相始有自王之意自筮之得中孚之晉以示金兒對曰中孚陰陽變動六位周而反及游魂之卦互體辛丑土以壬午水火用事與乾爲飛伏已酉金以丙戌火土用事與艮爲飛伏其繇曰日月運行一寒一暑榮光赫赫勦業大數當伺天運一周乃決國祚靈長之兆也士誠大喜且心動其慧麗欲納之曰我默有所禱試卜之欲使金兒自得吉卜而成之卦成金兒愕曰大不吉蒼蠅相乘於溷廁涕泣不語與母長訣士誠笑不信曰枯龜朽著亦何靈也金兒退訣其母曰兒命盡矣前此以術售者欲保全一家也然張氏必無成天運一周而已吾前此詭詞也吾

能臣妾若輩再為俘虜乎遂閉目不食不語數日而卒後張氏果一周而敗

論曰易曰婦人貞吉從一而終也夫子制義從婦凶也嗚呼後世夫子不若婦人者多矣不知制義故也而婦人反自同於夫子何哉此所謂女壯而乏金柅之繫者乎故曰坤道其順乎承天而時行坤以順承天施而德合無疆也故曰安貞之吉應地無疆此女子之德也吾觀葛妙真諸人合斯義矣至於倡女而能知義則足以媿夫子有餘故並表之

申灼根 刊

劉世昌 刊

門人曾廣基襄校

門人曾士琮詳校

元書卷九十四

